

太康縣志

卷五

卷五

人物

勲德 忠烈 文學

孝友 耆壽 義行

隱逸 宦寓 雜傳

metres  
1  
2  
3  
4  
5  
6  
7  
8  
9  
10  
11  
12  
13  
14  
15  
16  
17  
18  
19  
20  
21  
22  
23  
24  
25  
26  
27  
28  
29  
30  
31  
32

0 10 20 30 40 50 60 70 80 90 100 110 120 130 140 150 160 170 180

Kodak Color Control Patches

太康縣志人物目錄

勳德

漢

黃霸

彭宣

袁滂

魏

袁渙

袁霸

何夔

晉

何曾

何劭

何遵

何嵩

袁瓌

袁喬

袁歆

袁耽

謝鯤

謝尙

謝安

謝混

謝奕

謝元

宋

謝瞻

謝方明

謝裕

謝密

謝朏

謝淪

謝覽

袁湛

袁樞

袁憲

後魏  
袁式

唐

劉元佐

韓宏

韓公武

韓充



宋 沈倫 謝絳 元 韓克昌 韓元善 明 王鈍

王淪 郭曾 傅安 韓鐸 顧佐

張忠 郭濟 郭緒 王節 安康

安仁 劉慶 王照 師存智 韓瑀

王朝賢 師宗魯 何繼 張涵 王垵

王朝獻 姬自修 王汝訓 王垵 郭顯忠

秦尙明 杜文煥 張修德 郭世忠 王瑞麟

王榮寵 郭清國朝 李善感 王輔運 許重華

張見龍 魏觀颺 石六品 柳正芳 許維欽

王鑰 許定國 柳同春 柳生春 張法栻

王汧 孟汧 段舒 孔興唐 郭維壩

柳國勳 鄭志鯨 柳霈 王九儀 周龍章

柳遂夏 朱學海

補遺

唐 袁利貞 袁誼 忠烈

晉 謝琰 謝邈 謝純 南 袁淑 袁榮

明 李志義 張維世 馮貞吉 魏祚承 王來選

郭明興 袁九章 孫瑜璇 程鵬化 孫獻策

聶毓白 郭武興 郭雲興 曾省三 王發祥

王朝唐 姬履貞 姬履順 耿秉彛 郭進宗

郭震 郭士興 郭舉興 郭勃興 曾其量

安我國等百二十八人張鑠 王永隆 尙浮辰 王敬

國朝楊達 王曉 劉紹先等共十八人

文學

魏袁準 晉袁山松 袁宏 袁豹 袁峻

謝靈運 謝惠連 南齊謝朓 謝超宗

南梁謝微 謝舉 謝暉 北齊袁爽 唐袁朗

明曾省信 國朝耿繡彛 耿帝德 王者棟 高以紹

耿漢元 郭玉林 郭廷和 龍復 耿奇英

郭鴻年 李朗 王維翰 劉士貴 郭來賓

張西嶺 施明遠 朱奎光 許然

孝友

晉袁質 南宋謝述 袁最 南齊袁象 袁廓之

謝幾卿 南梁袁昂 謝朓 謝蘭 謝貞

明王杰 王朝元 江泰 陳智 徐舜耕

張文通 賈珩 石守燧 郭存智 魏珩

耿光 耿燿 耿炳 耿於葵 國朝 張鉉

劉杓 邵詵 魏衷 孟化梁 等共五人 王贊

軒茂良 單溥 萬虹 蔣桂昌 陳亮友

季文明 劉廣生 柳毓芳 鄭履謙 朱景嵩

王棟彩 高麟趾 董廷桂 吳應嵩 李以建

劉思麟 李文紀

耆壽

張詢 凌文舉 朱秀 劉臻 張

李亭電 李念舜 彭青松 王天成 王九法

兄弟五人 孔毓琦 父子祖孫十人 張文宗 張頓選 許文光

牛玉重 軒轅軍 張憲 周天行 程紹先

鮑朋 李學思

義行

明 王元佐 王相 李紘 張四維 楊體文

劉心乾 郭進儀 張淑周 張士賢 尙孟仕

國朝 王諤 王謙 郭宗哲 陳進德 郭書

鄭協 牛域 王講 丁金 楊木鐸

楊玉鐸 楊秉衡 毛士緒 程效先 劉永成

王亮采 王國範 李明遠 劉警菴 劉應萬

姜榮閣 劉天佑 朱起翔 王隨棟 張德基

李昌齡 魏天一 韓從龍 苑如淳 王崇和

劉國 宋榕 張克展 苑模 苑如泗

曹瓚 李克齊

隱逸

魏袁徽 明王銓 王瀛 王濡 顧興

徐貢羽 石可建 國朝段啟祥 李同周

宦寓

郭祐之 劉亨 馬俊

雜傳

吳廣 袁悅之 謝萬 謝石 袁顥

袁充 李可灼

太康縣志卷之五上

人物

中州清淑孕毓此間春華粲粲秋實班班求珠於淵取璧於山來軌思奮前轅可攀志人物

勲德

漢黃霸字次公陽夏人呂豪傑役使徙雲陵霸少學律令喜爲吏武帝末呂待詔入錢賞官補侍郎謁者坐同產有罪劾免後復入穀補左馮翊二百石卒史馮翊以霸入財爲官不署右職使領郡錢穀計簿書正以廉稱察補河東均輸長復察

廉爲河南太守丞霸爲人明察內斂又習文法然溫良有讓足知善御衆爲丞處議當於法合人心太守甚任之吏民愛敬焉時俗吏尙嚴酷而霸獨用寬和爲名會宣帝卽位在民間時知百姓苦吏急聞霸持法平召以爲廷尉正數決疑獄庭中稱平守丞相長史坐公卿大議廷中知長信少府夏侯勝非議詔書大不敬霸阿從不舉劾皆下廷尉繫獄當死霸因從勝受尙書獄中再踰冬積三歲迺出語在勝傳勝出復爲諫大夫令左馮翊宋畸舉霸賢良勝又口薦霸於上擢揚州刺史三歲遷潁川太守時上垂意於治數下恩澤詔書吏

不奉宣太守霸爲選擇良吏分部宣布詔令民咸知上意使郵亭鄉官皆畜雞豚巨贍鰥寡貧窮者然後爲條教置父老師帥伍長班行之吏民間勸以爲善防奸之意及務耕桑節用殖財種樹畜養去食穀馬米鹽靡密初若煩碎然霸精力能推行之吏民見者語次尋繹問它陰伏以相參考咸稱神明力行教化而後誅罰務在成就安全長吏霸以外寬內明得吏民心戶口歲增治爲天下第一徵守京兆尹秩二千石坐事連貶秩有詔歸潁川太守官以八百石居前後八年郡中愈治是時鳳皇神爵數集郡國潁川尤多天子曰霸治行



終長者下詔稱揚賜爵關內侯黃金百斤秩中二千石數月  
徵為太子太傅遷御史大夫五鳳三年代邴吉為丞相封建  
成侯食邑六百戶霸材長於治民及為丞相總綱紀號令風  
采不及丙魏于定國功名損於治郡時然自漢興言治民吏  
以霸為首為丞相五歲甘露三年薨諡曰定侯子思侯賞嗣  
為關都尉薨子忠侯輔嗣官至衛尉九卿薨子忠嗣侯訖王  
莽迺絕子孫為吏二千石者五六人 漢書本傳  
彭宣字子佩陽夏人治易事張禹舉為博士遷東平太傅禹  
以帝師見尊信薦宣經明有威重可任政事繇是入為右扶

風遷廷尉以王國人出為太原太守數年復入為大司農光  
祿勳右將軍哀帝即位徙左將軍歲餘上欲令丁傅處爪牙  
官迺策免宣以關內侯歸家罷數歲諫大夫鮑宣數薦宣會  
元壽元年正月朔日蝕鮑宣復上言迺召宣為光祿大夫遷  
御史大夫轉為大司空封長平侯會哀帝崩新都侯王莽為  
大司馬專權宣上書乞骸骨歸鄉里莽白太后策免就國數  
年薨諡曰頃侯傳子至孫王莽敗迺絕 漢書本傳  
袁滂字公熙扶樂人仕漢官至司徒滂純素寡欲不言人短  
當權寵之盛或以同異致禍滂獨中立於朝故愛憎不及焉

袁宏  
漢紀

魏袁渙字曜卿扶樂人父滂為漢司徒當時諸公子多越法度

而渙清靜舉動必以禮郡命為功曹扶樂屬陳郡郡中姦吏多自

引去後辟公府舉高第遷侍御史除譙令不就劉備之為豫

州舉渙茂才後避地江淮間為袁術所命術每所咨訪渙常

正議術不能抗然敬之不敢不禮也頃之呂布擊術於阜陵

渙往從之遂復為布所拘留布初與劉備和親後離隙布欲

使渙作書言辱備渙不可再三強之不許布大怒以兵脅之

渙顏色不變笑應曰渙聞惟德可以辱人不聞以罵使彼固

君子耶且不耻將軍之言彼誠小人邪將復將軍之意則辱

在此不在於彼且渙他日之事劉將軍猶今日之事將軍也

如一旦去此復罵將軍可乎布慙而止布誅渙得歸太祖拜

為沛南部都尉是時新募民開屯田民不樂多逃亡渙白太

祖曰夫民安土重遷不可卒變易以順行難以逆動宜順其

意樂之者乃取不欲者勿強太祖從之百姓大悅遷為梁相

渙每敕諸縣務存鰥寡高年表異孝子貞婦常談曰世治則

禮詳世亂則禮簡全在斟酌之間耳方今雖擾攘難以禮化

然在吾所以為之為政崇教訓恕思而後行外溫柔而內能

斷以病去官百姓思之後徵為諫議大夫丞相軍祭酒前後

得賜甚多皆散盡之家無所儲人服其清時有傳劉備死者

羣臣皆賀渙以嘗為備舉吏獨不賀居官數年卒渙子侃亦

清粹閑素有父風歷位郡守尚書袁氏世紀曰渙有四子侃

當柔而不犯善與人交在典廢之間人之所趨務者常恬退

不為也時人以是稱之歷位黃門選部郎號為清平稍遷至

尚書早卒寓字宜厚精辨有機理好道家之言少被病未官

而卒與字公榮行足以厲俗言約而理當終於光祿勳準字

孝尼忠信公正不耻下問唯恐人之不勝已以世事多險故

常治退而不敢求進著書十餘萬言論治世之務為易周官

詩傳及論五經滯義聖人之微言以傳於世

袁霸字公恪渙從弟有功幹魏初為大司農及同郡何夔並

知名於時而霸子亮夔子曾與侃復齊聲友善亮貞固自守

行疾何晏鄧融等著論以譏切之位至河南尹尚書

見隱逸傳徽弟敏有武藝好水功官至河隄謁者三國志

何夔字叔龍陽夏人曾祖父熙漢安帝時官至車騎將軍夔

幼喪父與母兄居以孝友稱避亂淮南後袁術至壽春辟之

夔不應然遂為術所留久之術與橋蕤俱攻圍蕲陽蕲陽為

太祖固守術以夔被郡人欲脅令說蕲陽遂遁匿潯陽山術知

夔終不為已用乃止術從兄山陽太守遺母夔從姑也是以

行得免明年到本郡頃之太祖辟爲司空掾屬太祖遊歷豫  
屬公事往往加杖夔常畜毒藥誓死無辱是以終不見及出  
爲城父令遷長廣太守郡濱山海黃巾未平豪傑多苦無  
譚就加以官位長廣縣人管承從衆三千餘家爲寇言言  
欲舉兵攻之夔曰承等未被德教故不知反善不如徐喻以  
恩德使從容自悔可不煩兵而定乃遣郡丞黃珍往爲陳說  
敗承等皆請服夔遣吏成宏領校尉長廣縣承等郊迎率牛  
酒詣郡卒平賊從錢衆亦數千夔率郡兵與張邈共討定之  
東牟人王營衆三千餘家脅昌陽縣爲亂夔遣吏王欽等投

以計畧使離散之旬月皆平定是時太祖始制新科下州郡  
又收租稅綿絹夔上言喪亂以來民人失所今疆域初定加  
以饑饉宜依遠域新邦之典其民間小事使長吏臨時隨宜  
上不背正法下以順百姓之心太祖從之徵還參丞相軍事  
海賊郭祖寇暴樂安濟南界州郡苦之太祖以夔前在長廣  
有威信拜樂安太守到官數月諸城悉平入爲丞相東曹掾  
魏國旣建拜尙書僕射文帝爲太子以涼茂爲太傅夔爲少  
傅特命二傅與尙書東曹並選太子諸侯官屬茂卒以夔代  
茂每月朔太傅入見太子正法服而禮焉他日無會儀夔遷

太僕太子欲與辭宿戒供饗無往意乃與書請之饗以國有常制遂不往其履正如此然於節儉之世最為豪汰文帝踐

阼封成陽亭侯邑三百家以疾薨謚曰靖侯子曾嗣以上俱三國志

本傳

晉何曾字穎考少襲父爵好學博聞與同郡袁侃齊名魏明帝初為平原侯曾為文學及即位累遷散騎侍郎汲郡典農中郎將給事黃門侍郎遷散騎常侍及宣帝將伐遼東曾上疏魏帝太尉奉辭誅罪精甲銳鋒步騎數萬道路迴阻且四千里或潛道消引日月命無常期人非金石宜選大臣名將

威重宿著者成其禮秩遣詣北軍進同謀畧退為副佐雖有萬一不虞之變軍主有儲則無患矣帝不從出補河內太守在任有威嚴之稱徵拜侍中母憂去官嘉平中為司隸校尉撫軍校事尹模憑寵作威姦利益積曾奏劾之朝廷稱焉時曹爽專權宣帝稱疾曾亦謝病爽誅乃起視事魏帝之廢也曾與其謀焉時步兵校尉阮籍負才放誕居喪無禮曾言於帝曰公方以孝治天下而聽阮籍以重哀飲酒食肉於公座宜擯四裔無令汙染華夏帝雖不從時人敬憚之母邱儉誅子甸妻荀應坐死其族兄顗族父虞並景帝姻通共表魏帝

以苟其命詔聽離婚苟所生女芝爲潁川太守劉子元妻亦坐死以懷妊繫獄荀辭詣會乞沒爲官婢以贖芝命會哀之騰辭上議朝廷僉以爲當遂改法曾在司隸積年遷尙書正元中爲鎮北將軍都督河北諸軍事假節遷征北將軍進封潁昌鄉侯咸熙初拜司徒改封朗陵侯文帝爲晉王會與高柔鄭冲俱爲三公將入見會獨致拜盡敬二人猶揖而已武帝襲王位以會爲晉丞相加侍中與裴秀王沈等勸進踐阼拜太尉進爵爲公食邑千八百戶泰始初以會爲太保侍中如故久之以本官領司徒會固讓不許遣散騎常侍諭旨乃

視事進位太傅會以老年屢乞遜位進太宰侍中如故朝會劔履乘輿上殿令二子侍從咸寧四年薨時年八十禮官議謚博士秦秀謚爲繆醜帝不從策謚曰孝太康末子劭自表改謚爲元會性至孝闔門整肅自少及長無聲樂嬖幸之好年老之後與妻相見皆正衣冠相待如賓然性奢侈食日萬錢猶曰無下箸處外寬內忌卑賈充而附之以此爲正直所非二子遵劭劭嗣

劭字敬祖少與武帝同年有總角之好帝爲王太子以劭爲中庶子及卽位轉散騎常侍甚見親待遷侍中尙書惠帝卽

位初建東宮盛選六傅以劭爲太子太師通省尙書事後轉特進累遷尙書左僕射劭博學善屬文陳說近代事若指諸掌永康初遷司徒趙王倫篡位以劭爲太宰及三王交爭劭以軒冕游其間無怨之者而驕奢簡貴亦有父風一日之供以錢二萬爲限然優游自足不貪權勢嘗語鄉人王詮曰僕雖名位過幸少無可書之事惟與夏侯長容諫授博士可傳史冊耳所撰荀粲王弼傳及諸奏議文章並行於世永寧元年薨贈司徒諡曰康子岐嗣

遵字思祖劭庶兄也少有幹能起家散騎黃門郎散騎常侍侍中累轉大鴻臚性亦奢汰役使御府工匠作禁物又鑿行器爲司隸劉毅所奏免官太康初起爲魏郡太守遷太僕卿又免官卒於家

何嵩字泰基曾之孫遵之子也寬宏愛士博觀墳籍尤善史漢少歷清官領著作郎恪守祖訓不染何氏矯佚習尤爲幹盡貽謀之一助云

袁瓌字山甫陽夏人魏郎中令渙之曾孫也祖父並早卒瓌與弟猷欲奉母避亂求爲江淮間縣拜呂令轉江都因南渡元帝以爲丹陽令中興建拜奉朝請遷治書御史時東海王

越尸既爲石勒所焚妃裴氏求招魂葬越朝廷疑之瓌與博士傅純議以爲招魂葬是謂埋神不可從也帝然之雖許裴氏招魂葬越遂下詔禁之尋除廬江太守大將軍王敦引爲諮議參軍俄爲臨川太守敦平爲鎮南將軍卞敦軍司尋自解還都游於會稽蘇峻之難與王舒共起義軍以功封長合鄉侯徵補散騎常侍徙大司農尋除國子祭酒加散騎常侍於時喪亂之後禮教陵遲瓌上疏畧曰臣聞先王之教也崇典訓以宏遠代明禮樂以流後生所以導萬物之性暢爲善之道也疇昔皇運陵替喪亂屢臻儒林之教漸頽庠序之禮

有關國學索然墳籍莫啟有心之徒抱志無由今陛下以聖明臨朝百官以虔恭蒞事朝野無虞江外謐靜如之何泱泱之風漠然無聞洋洋之美墜於聖世乎古人有言詩書義之府禮樂德之則實宜留心經籍闡明學義使諷誦之音盈於京室味道之賢是則是詠豈不盛哉若得給其宅地備其學徒博士僚屬粗有其官則臣之願也疏奏成帝從之國學之興自瓌始也以年在懸車上疏告老尋卒追贈光祿大夫謚曰恭子喬嗣

喬字彥叔初拜佐著作郎輔國將軍桓温請爲司馬除司徒



左西屬不就拜尙書郎桓溫鎮京口復引爲司馬領廣陵相  
遷安西諮議叅軍長沙相不拜尋督沔中諸戍江夏隨義陽  
三郡軍事建武將軍江夏相時桓溫謀伐蜀衆以爲不可喬  
勸溫曰夫經畧大事故非常情所具智者了於胸心然後舉  
無遺算耳今天下之難一寇而已蜀雖險固方胡爲弱將欲  
除之先從易者今蜀人自以斗絕一方恃其完固不修攻戰  
之具若以精卒一萬輕軍速進比彼聞之我已入其險要李  
勢君臣不過自力一戰擒之必矣論者恐大軍旣西胡必闕  
覷此又似是而非何者胡聞萬里征伐以爲內有重備必不

敢動縱復越逸江渚諸軍足以守境此無憂矣蜀土富實號  
稱天府勢據上流易爲寇盜若襲而取之有其人衆此國之  
大利也溫從之使喬以江夏相領二千人爲軍鋒師次彭模  
去賊已近議者欲兩道並進以分賊勢喬曰今深入萬里置  
之死地士無反顧之心所謂人自爲戰者也今分爲兩軍軍  
力不一萬一偏敗則大事去矣不如全軍而進棄釜餽齎三  
日糧勝可必矣溫以爲然卽一時俱進去成都十里與賊大  
戰前鋒失利喬軍亦退矢及馬首左右失色喬因麾而進聲  
氣愈厲遂大破之長驅至成都李勢旣降勢將鄧定隗文以

其屬反衆各萬餘温自擊定喬擊文破之進號龍驤將軍封  
湘西伯尋卒年三十六追贈益州刺史諡曰簡喬博學有文  
才注論語及詩並諸文筆皆行於世子方平嗣亦以軌素自  
立辟大司馬掾歷義興瑯琊太守卒子山松嗣

袁猷字申甫少與瓌齊名代瓌爲呂令復相繼爲江都由是  
俱渡江瓌爲丹陽猷爲武康兄弟列宰名邑論者美之歷位  
侍中衛尉卿

袁耽字彥道少有才氣倣儻不羈爲士類所稱蘇峻之役王  
導引爲參軍隨在石頭初路永匡術賈寧等皆峻心腹聞祖

約奔敗懼事不立迭說峻誅大臣峻既不納永等陰結於導  
導使耽潛說路永使歸順峻平封秭歸男拜建威將軍歷陽  
太守咸康初石季龍游騎十餘匹至歷陽耽上列不言騎少  
時胡寇強盛朝野危懼王導以宰輔之重請自討之旣而賊  
騎不多又已退散朝廷以耽失於輕妄黜之尋復爲導從事

中郎方加大任會卒時年二十五子質

以上俱晉書本傳

謝鯤字幼輿陽夏人祖續典農中郎將父衡以儒素顯仕至  
國子祭酒鯤少知名通簡有高識不修威儀好老易能歌善  
鼓琴王衍嵇紹並奇之永興中長沙王乂入輔政時有疾鯤

者言其將出奔又欲鞭之鯤解衣就罰曾無忤容既舍之又無喜色太傅東海王越聞其名辟爲掾任達不拘尋坐家僮取官豪除名時以鯤初登宰府便至黜辱爲之歎恨鯤聞之方清歌鼓琴不以屑意越尋更辟之轉參軍事鯤以時方多故乃謝病去職避地豫章行經空亭中夜宿此亭舊每殺人將曉黃衣人呼鯤字令開戶鯤愴然無懼色便於窻中度手牽之脚斷視之鹿也尋血獲之爾後此亭無復妖怪左將軍王敦引爲長史以討杜弢功封咸寧亭侯母憂去職服闋遷敦大將軍長史鯤不徇功名無砥礪行居身於可否之間雖

自處若穢而動不累高敦不臣之迹顯於朝野鯤知不可以道匡弼乃優游寄寓不屑政事從容諷議卒歲而已嘗使至都明帝在東宮甚相親重問曰論者以君方庾亮自謂何如答曰端委廟堂使百僚準則鯤不如亮一邱一壑自謂過之及敦將爲逆謂鯤曰劉隗奸邪將危社稷吾欲除君側之惡何如對曰隗誠始禍然城狐社鼠也敦怒出鯤爲豫章太守又留不遣藉其才望逼與俱下敦至石頭歎曰吾不復得爲盛德事矣鯤曰何爲其然但使自今以往日忘日去耳敦至都殺害忠賢不朝而去時皆爲其憂而鯤推理安當時進正

言敦詵不能用內亦不悅軍還使之郡蒞政清肅百姓愛之  
尋卒官年四十三敦死後追贈太常諡曰康子尙嗣

尙字仁祖幼有至性七歲喪兄哀痛過禮親戚異之八歲神  
悟夙成鯁常携之送客或曰此兒一坐之顏回也尙應聲答  
曰坐無尼父焉別顏回席賓莫不歎異十餘歲遭父憂丹陽  
尹温嶠弔之尙號咷極哀旣而收涕告訴舉止有異常童嶠  
甚竒之及長開率穎秀辨悟絕倫脫略細行不爲流俗之事  
好衣刺文袴諸父責之因而自改遂知名善音樂博綜衆藝  
司徒王導深器之辟爲掾襲父爵咸寧侯始到府通謁導以

其有勝會謂曰聞君能作雒雒舞一坐傾想寧有此理不尙  
曰佳便著衣幘而舞旁若無人其率詣如此轉西曹屬遷會  
稽王友入補給事黃門侍郎出爲建武將軍歷陽太守轉督  
江夏義陽隨三郡軍事江夏相將軍如故爲政清簡始到官  
郡府以布四十匹爲尙造烏布帳尙壞之以爲軍士襦袴建  
元二年以爲南中郎將餘官如故會庾冰薨復以本號督豫  
州四郡領江州刺史復轉西中郎將督揚州之六郡諸軍事  
豫州刺史假節鎮歷陽大司馬桓温欲有事中原使尙率衆  
向壽春進號安西將軍初苻健將張遇降尙尙不能緩懷之

遇怒據許昌叛尙討之爲遇所敗收付廷尉時康獻皇后臨朝尙之甥也特令降號爲廷威將軍苻健將楊平戍許昌尙遣兵襲破之徵授給事中賜輅車鼓吹戍石頭永和中拜尙書僕射出爲都督江西淮南諸軍事前將軍豫州刺史給事中僕射如故鎮歷陽加都督豫州揚州之五郡軍事在任有政績上表求入朝因留京師署僕射事尋進號鎮西將軍鎮壽陽尙於是採拾樂人並制石磬以備太樂江表有鐘石之樂自尙始也桓溫北平洛陽上疏請尙爲都督司州諸軍事將鎮洛陽以疾病不行升平初又進都督豫冀幽并四州病

篤徵拜衛將軍加散騎常侍未至卒於歷陽時年五十詔贈散騎常侍衛將軍開府儀同三司謚曰簡

謝安字安石尙從弟也父哀太常卿安年四歲時譙郡桓彝見而歎曰此兒風神秀徹後當不減王東海及總角神識沈敏風宇條暢善行書初辟司徒府除佐著作郎並以疾辭寓居會稽與王羲之及高陽許詢桑門支遁遊處揚州刺史庾冰以安有重名累下郡縣敦逼不得已赴召月餘告歸復除尙書郎瑯琊王友並不起安雖放情邱壑然每游賞必以妓女從簡文帝時爲相曰安石旣與人同樂必不得不與人同

憂召之必至時安弟萬爲西中郎將總藩任之重安雖處衡門名猶出其右自然有公輔之望及萬黜廢安始有仕進志年已四十餘矣征西大將軍桓溫請爲司馬尋除吳興太守在官無當時譽去後爲人所思頃之徵拜侍中遷吏部尚書中護軍簡文帝疾篤溫上疏薦安宜受顧命及帝崩溫入赴山陵止新亭大陳兵衛將移殯至呼安及王坦之欲於坐害之坦之甚懼問計於安安神色不變曰晉祚存亡在此一行旣見溫坦之流汗沾衣倒執手板安從容就席坐定謂溫曰安聞諸侯有道守在四鄰明公何須壁後置人邪溫笑曰正

自不能不爾遂笑語移日溫嘗以安所作簡文謚議以示坐賓曰此謝安石碎金也時孝武帝富於春秋溫威振内外人情噂嗜互生同異安與坦之盡忠匡翼終能輯穆及溫病篤諷朝廷加九錫使袁宏具草安見輒改之由是歷旬不就會溫薨錫命遂寢尋爲尚書僕射領吏部加後將軍及中書令王坦之出爲徐州刺史詔安總關中書事時強敵寇境邊書縶至梁益不守樊鄧陷沒安每鎮以和靖御以長算德政旣行文武用命不存小察宏以大綱威懷外著人皆比之王導誦文雅過之又領揚州刺史詔以甲仗百人入殿時帝始親

萬機進安中書監驃騎將軍錄尚書事固讓軍號於時懸象失度亢旱彌年安奏興滅繼絕求晉初佐命功臣後而封之加司徒後軍文武盡配大府又讓不拜復加侍中都督揚豫徐兗青五州幽州之燕國諸軍事假節時苻堅強盛疆場多虞諸將敗退相繼安遣弟石及亮子元等應機征討所在尅捷拜衛將軍開府儀同三司封建昌縣公堅後率衆號百萬次於淮肥京師震恐加安征討大都督元入問計安夷然無懼色答曰已別有旨旣而寂然元不敢復言乃令張元重請安遂命駕出山墅與元圍碁賭別墅安碁常劣於元是日元

懼便爲敵手而又不勝安顧謂其甥羊曇曰以墅乞汝安遂游陟至夜乃還指授將帥各當其任元等旣破堅有驛書至安方對客圍碁看書旣竟便攝放牀上了無喜色碁如故客問之徐答云小兒輩遂已破賊旣罷還內過戶隈心喜甚不覺屐齒之折其矯情鎮物如此以總統功進拜太保安方欲混一文軌上疏求自北征乃進都督揚江荆司豫徐兗青冀幽并寧益雍梁十五州軍事加黃鉞其本官悉如故置從事中郎二人安上疏讓太保及爵不許是時桓冲旣卒荆江二州並缺物論以元勳望宜以授之安乃以桓石民爲荊州改

桓伊於中流石虔爲豫州旣以三桓據三州彼此無怨各得所任時會稽王道子專權姦諂頗相扇搆安出鎮廣陵帝出祖於西池獻觴賦詩焉安雖受朝寄然東山之志始末不渝雅志未就遂遇疾篤上疏請量宜旋旆並召子征虜將軍琰掣甲息徒命龍驤將軍朱序進據洛陽前鋒都督元抗威彭而委以董督若二賊假延來年水生東西齊舉詔遣侍中慰勞遂還都聞當輿入西州門自以本志不遂深自慨失因悵然謂所親曰昔桓溫在時吾常懼不全忽夢乘溫輿行十六里見一白雞而止乘溫輿者代其位也十六里止今十六年

矣白雞主酉今太歲在酉吾病其不起乎乃上疏遜位詔遣侍中尙書喻旨先是安發石頭金鼓忽破又語未嘗謬而忽一誤衆亦怪異之尋薨時年六十六贈太傅諡曰文靖更封盧陵郡公一子瑤琰瑤爵官至瑯琊王友早卒子該嗣終東陽太守

謝混

琰之子

字叔源少有美譽善屬文初孝武帝爲晉陵公主

求壻謂王珣曰主壻但如劉真長王子敬便足如王處仲桓元子誠可才小富貴便豫人家事珣對曰謝混雖不及真長不減子敬帝曰如此便足未幾帝崩袁崧欲以女妻之珣曰



卿莫近禁巒初元帝始鎮建業公私窘罄每得豚以爲珍膳  
項下一巒尤美輒以薦帝呼爲禁巒故珣以爲戲混竟尙主  
襲父爵桓元嘗欲以安宅爲營混曰召伯之仁猶惠及甘棠  
文靖之德更不保五畝之宅邪元慙而止歷中書令中領軍  
尙書左僕射領選以黨劉毅爲劉裕所殺及宋受禪謝晦謂  
劉裕曰陛下登壇日恨不得謝益壽奉璽綬劉裕亦歎曰吾  
甚恨之使後生不得見其風流益壽混小字也

謝奕字無奕少有名譽初爲剡令有老人犯法奕以醇酒飲  
之醉猶未已安時年七八歲在奕膝邊諫止之奕爲改容遣

之與桓温善温辟爲安西司馬猶推布衣好在温坐岸幘笑  
詠無異常日桓温曰我方外司馬奕每因酒無復朝廷禮常  
逼温飲温走入南康主門避之主曰君若無狂司馬我何由  
得相見奕遂携酒就聽事引温一兵帥共飲曰失一老兵得  
一老兵温不之責從兄尙有德政旣卒爲西藩所思朝議以  
奕立行有素必能嗣尙事乃遷都督豫兗冀并四州軍事安  
西將軍豫州刺史假節未幾卒官贈鎮西將軍三子泉靖元  
泉早有名譽歷義興太守靖官至太常

元字幼度少穎悟與從兄郎俱爲叔父安所器重及長有經

國才畧屢辟不起後與王珣俱被桓溫辟爲掾並禮重之轉  
征西將軍桓豁司馬領南郡相監北征諸軍事於時苻堅強  
盛邊境數被侵寇朝廷求文武良將可以鎮禦北方者安乃  
以元應舉徵還拜建武將軍兗州刺史領廣陵相監江北諸  
軍事時苻堅遣軍圍襄陽車騎將軍桓冲禦之詔元發三州  
人丁遣彭城内史何謙游軍襄淮以爲形援襄陽旣沒堅將  
彭超攻龍驤將軍戴遂於彭城元率東莞太守高衡後將軍  
何謙次泗口時彭超置輜重於留城元乃揚聲遣謙等向留  
城超聞之還保輜重謙馳進解彭城圍超復進軍南侵堅將

何難毛當自襄陽來會超圍幽州刺史田洛於三阿有衆六  
萬詔征虜將軍謝石率水軍次涂中右衛將軍毛安之等次  
堂邑旣而盱眙城陷安之等軍人相驚遂各分散朝廷震動  
元於是自廣陵西討難等何謙解田洛圍據白馬與賊大  
戰破之斬其僞將都督顏因復進擊又破之斬其僞將邵保  
超難引退元率何謙戴遂田洛追之戰於君川又破之元參  
軍劉牢之攻破浮航及白船督護諸葛侃畢父令李都又破  
其運艦難等相率北走僅以身免於是罷彭城下邳二戍詔  
遣殿中將軍慰勞進號冠軍加領徐州刺史封東興縣侯及

苻堅自率兵次於項城衆號百萬先遣苻融慕容暉張蚝苻方等至潁口梁成王先等屯洛間詔以元爲前鋒都督徐兗青三州揚州之晉陵幽州之燕國諸軍事與叔父征虜將軍石從弟輔國將軍琰等距之衆凡八萬元先遣廣陵相劉牢之五千人直指洛澗卽斬梁成及生擒堅僞將梁他等收其軍實堅進屯壽陽列陣肥水元軍不得渡元使謂苻融曰君遠涉吾地而臨水爲陣是不欲速戰諸君稍卻令將士得周旋僕與諸君緩轡而觀之不亦樂乎堅衆皆曰宜阻肥水莫令得上堅曰但卻軍令得過我以鐵騎數十萬向水逼而

心之融亦以爲然遂麾使卻陣衆因亂不能止於是元等以精銳八千涉渡肥水石軍距張蚝小退琰元仍進決戰肥水南堅中流矢臨陣斬融堅衆奔潰自右蹈藉及投水死者不可勝計肥水爲之不流餘衆棄甲宵遁聞風聲鶴唳皆以爲王師已至草行露宿重以饑寒死者十七八詔遣殿中將軍慰勞進號前將軍假節固讓不受賜錢百萬綵千匹旣而安奏苻堅喪敗宜乘其喪會以元爲前鋒都督率冠軍將軍桓石虔徑造渦潁經畧舊都元復率衆次於彭城遣參軍劉襲攻堅兗州刺史張崇於鄆城走之使劉牢之守鄆城兗州旣

平元患水道險澁糧運艱難用督護閩人南謀堰呂梁水樹  
柵立七埭爲派擁二岸之流以利運漕又進伐青州遣淮陵  
太守高素以三千人向廣固降堅青州刺史苻朗又進伐冀  
州遣龍驤將軍劉牢之濟北太守丁匡據礪碣濟陽太守郭  
滿據滑臺奮武將軍顏雄渡河立營堅子丕遣將桑據屯黎  
陽元命劉襲夜襲據走之又遣晉陵太守滕恬之渡河守黎  
陽三魏皆降以充青司豫平加元都督徐兗青司冀幽并七  
州軍事封康樂縣公復遣寧遠將軍春演伐申凱於魏郡破  
之元欲令豫州刺史朱序鎮梁國元住彭城北固河上西授

洛陽內藩朝廷朝議以征役旣久宜置戍而還使元還鎮淮  
陰序鎮壽陽會翟遼據黎陽反執滕恬之又泰山太守張願  
舉郡叛河北騷動元自以處分失所上疏送節盡求解所職  
詔慰勞令且還鎮淮陰以朱序代鎮彭城元旣還遇疾上疏  
解職詔不許元又自陳使移鎮東陽城元卽路於道疾篤詔  
遣高手醫一人令自消息又使還京口療疾元奉詔便還病  
久不差前後表疏十餘上久之乃轉授散騎常侍左將軍會  
稽內史輿疾之郡十三年卒於官年四十六追贈車騎將軍  
開府儀同三司謚曰獻武子瑒以上俱晉書本傳

宋謝瞻字宣遠一名楷字通遠陽夏人衛將軍晦第三兄也年六歲能屬文為紫石英贊果然詩當時才士莫不歎異瞻幼孤叔母劉撫養有恩兄弟事之同於至親劉弟柳為吳郡將姊俱行瞻不能違遠解職隨從為柳建威長史後為宋武帝從事中郎晦時為宋臺右衛權遇已重於彭城還都迎家賓客輻湊門巷填咽瞻在家驚駭謂晦曰汝名位未多而人歸趨及爾吾家以素退為業不敢干豫時事交游不遇親朋而汝遂勢傾朝野此豈門戶之福耶乃籬隔門庭曰吾不忍見此及還彭城言於武帝曰臣本素士父祖位不過二千石弟

年始三十志用凡近位任顯密福過災生特乞降黜以保衰門前後屢陳帝欲以瞻為吳興郡又自陳請乃為豫章太守晦或以朝廷密事語瞻瞻輒向親舊說為戲笑以絕其言晦遂建佐命功瞻愈憂懼永初二年在郡遇疾不治幸於不永臨終遺晦書曰吾得啟體幸全歸骨山足亦何所多恨弟思自勉勵為國為家卒時年三十五瞻善於文章辭采之美與從叔混族弟靈運相抗靈運父瑛無才能為秘書郎早卒而靈運好臧否人物混患之欲加裁折謂瞻曰非汝不能乃與晦曜宏微等共遊戲使瞻與靈運共車靈運登車便商較人

物瞻謂曰秘書早亡談者已互有同異靈運默然言論自此

衰止

宋書參南史

謝方明祖鐵字鐵石位永嘉太守父冲字秀度中書郎家在會稽病歸爲孫恩所殺贈散騎常侍方明隨伯父吳興太守邈在郡孫恩寇會稽東土諸郡響應吳興人胡桀郤驃破東遷縣方明勸邈避之不從賊至被害方明逃免初邈舅子長樂馮嗣之及北方學士馮翊仇元達俱投邈禮待甚簡一人並恨遂與恩通謀劉牢之謝琰等討恩恩走臨海嗣之等不得同去方更聚合方明體素羸弱而勇決過人結邈門生討

嗣之等悉禽手刃之時亂後吉凶禮廢方明合門遇禍資產無遺而營舉凶功盡力數月葬送並畢平世備禮無以加也頃之孫恩重陷會稽謝琰見害因購方明甚急方明於上虞載母妹奔東陽由黃蘗嶠出鄱陽附載還初寄居國子學流離險厄屯苦備經而貞履之操在約無改桓元剋建業丹陽尹卞範之勢傾朝野欲以女嫁方明方明終不回桓元聞而賞之卽除著作佐郎後從兄景仁舉爲宋武中軍主簿方明知無不爲帝謂曰愧未有瓜衍之賞且當與卿共豫章國祿屢加賞賜方明嚴恪善自居遇雖處暗室未嘗有惰容從兄

混有重名唯歲節朝拜而已丹陽尹劉穆之權重當時朝野  
輻湊其不至者惟混方明鄒僧施蔡廓四人而已穆之甚恨  
及混等見殺方明廓來往造穆之穆之大悅白武帝曰謝方  
明可謂名家駒頃之轉從事中郎仍爲右將軍道憐長史武  
帝令府中書皆諮決之轉爲中軍長史尋加晉陵太守復爲  
驃騎長史南郡相委任如初嘗年終江陵縣獄因事無輕重  
悉放歸家使過正三日還到罪重者二十餘人綱紀以下莫  
不疑懼固諫方明不納一時遣之囚及父兄並驚喜涕泣以  
爲就死無恨至期有重罪一人醉不能歸違一日乃反餘一

囚十日不來五官朱千期請見欲自討之方明知爲囚事使  
左右謝五官不須入囚自當反囚逡巡墟里不能自歸鄉村  
責讓率領將送竟無逃者遠近歎服焉宋武帝受命位侍中  
丹陽尹有能名轉會稽太守江東人戶殷盛風俗峻刻強弱  
相陵姦吏蜂起符書一下文攝相續方明深達政體不拘文  
法闊畧苛細務在統領貴族豪士莫敢犯禁除比伍之坐判  
久繫之獄前後征伐每兵運不充悉倩士庶事宣皆使還本  
而守宰不明與奪乖謬人事不至必被抑塞方明簡汰羣屬  
各順所宜東土稱詠之性尤愛惜未嘗有所是非承詔入

不易其政必宜改者則漸變使無迹可尋卒官

謝裕字景仁朗弟允之子而晦從父也名與宋武帝諱同故以字行允字令度位宣城內史景仁幼爲從祖安所知始爲前軍行參軍會稽王庶子元顯嬖人張法順權傾一時內外無不造門唯景仁不至年三十而方爲著作佐郎遷元議元顯見景仁謂四坐曰司馬庶人父子云何不敗遂令謝景仁三十而方佐著作郎元建楚臺以補黃門侍郎及篡位領驍騎將軍景仁博聞強識善敘前言往行元每與言不倦宋武帝爲桓修撫軍中兵參軍嘗請景仁諮事景仁與語說因留

帝食食未辨而景仁爲元所召元性促俄頃間騎詔續至帝屢求去景仁不許曰主上見待要應有方我欲與客食豈不得待竟安坐飽食然後應召帝甚感之及平建鄴景仁與百僚同見武帝目之曰此名公孫也歷位武帝鎮軍司馬復爲車騎司馬帝將伐慕容超朝議皆謂不可景仁獨曰公建桓文之烈應天人之心雖業高振古而德刑未樹宜推亡固存廣振威畧平定之後養銳息徒然後觀兵洛汭修復園寢豈有縱敵貽患者哉帝從之及北伐轉景仁大司馬左司馬專總府任又遷吏部尙書爲左僕射景仁性矜嚴整潔居守淨



麗每唾輒唾左右人衣武帝雅相知重申以昏姻廬陵王義  
真妃景仁女也十二年卒贈金紫光祿大夫葬日武帝親臨  
甚慟

謝密字宏微晉西中郎萬之曾孫尚書左僕射景仁從子也  
祖韶車騎司馬父思武昌太守宏微年十歲繼從叔峻名犯  
所繼內諱故以字行童幼時精神端審時然後言所繼叔父  
混名知人見而異之謂思曰此兒深中夙敏方成佳器有子  
如此足矣義熙初襲爵建昌縣侯宏微家素貧儉而所繼豐  
泰唯受數千卷書國吏數人而已遺財祿秩一不關預混聞

而驚歎謂國郎中令漆凱之曰建昌國祿本應與北舍共之  
國侯既不厝意今可依常分送宏微重混言乃少有所受北  
舍宏微本家也混風格高峻少所交納唯與族子靈運瞻晦  
曜以文義賞會常共宴處居在烏衣巷故謂之烏衣之游混  
詩所言昔爲烏衣游戚戚皆親姓者也其外雖復高流時譽  
莫敢造門瞻等才辭辨富宏微每以約言服之混特所敬貴  
號曰微子謂瞻等曰汝諸人雖才義豐辯未必皆慊衆心至  
於領會機賞言約理要故當與我共推微子常言阿遠剛躁  
負氣阿容博而無檢曜仗才而持操不篤晦自知而納善不

周設復功濟三才終亦以此爲恨至如微子吾無間然又言微子異不傷物同不害正若年造六十必至公輔矧宏微兄通遠卽瞻字客兒靈運小名也晉世名家身有國封者起家多拜員外散騎侍郎宏微亦拜員外散騎侍郎瑯琊王大司馬參軍義熙八年混以劉毅黨見誅混妻晉陵公主改適琅邪王暕公主雖執意不行而詔與謝氏離絕公主以混家事委之宏微混仍世宰相一門兩封田業十餘處僮役千人唯有二女年並數歲宏微經紀生業事若在公一錢尺帛皆有文簿宋武受命晉陵公主降封東鄉君以混得罪前代東鄉

君節義可嘉聽還謝氏白混亡至是九年而室宇修整倉庫充盈門徒不異平日田疇墾闢有加於舊東鄉君歎曰僕射生平重此一子可謂知人僕射爲不亡矣中外姻親道俗義舊見東鄉之歸者入門莫不歎息或爲流涕感宏微之義也性嚴正舉止必修禮度事繼親之黨恭謹過常於伯叔二母歸宗兩姑晨夕瞻奉盡其誠敬內外或傳語通訊輒正其衣冠婢僕之前不妄言笑由是尊卑大小敬之若神時有蔡湛之者及見謝安兄弟謂人曰宏微貌類中郎而性似文靖文帝初封宜都王鎮江陵以瑯琊王球爲友宏微爲文學母憂

去職居喪以孝稱服闋蔬素踰時文帝卽位爲黃門侍郎與  
王華王曇首殷景仁劉湛等號曰五臣遷備書吏部郎參機  
密尋轉右衛將軍諸故吏臣佐並委宏微選擬居身清約兄  
曜卒官宏微哀戚過禮服雖除猶不啜魚肉宏微少孤事兄  
如父友睦之至舉世莫及歷位中庶子加侍中固讓不拜乃  
聽解中庶子東鄉君薨遺財千萬園宅十餘所宏微一不取  
自以私祿營葬混墓開宏微牽疾臨赴病遂甚元嘉十年卒  
年四十二追贈太常子莊莊見文學

謝朓字敬冲幼聰慧莊器之常置左右十歲能屬文莊遊土

山使朓命篇攬筆便就琅琊王景文謂莊曰賢子足稱神童  
復爲後來特達莊撫朓背曰真吾家千金宋孝武帝遊姑熟  
敕莊攜朓從駕詔爲洞井讚於坐奏之帝曰雖小重也仕宋  
爲衛將軍袁粲長史後爲臨川內史齊高帝爲驃騎將軍輔  
政選朓爲長史高帝方圖禪代欲以朓佐命遷左長史每夕  
置酒獨與朓論魏晉故事言石苞不早勸晉文死方慟哭方  
之馮異非知幾也朓曰昔魏臣有勸魏武卽帝位魏武曰有  
用我者其周文王乎晉文世事魏氏將必終身北面假使魏  
早依唐虞故事亦當三讓彌高帝不悅更引王儉爲左長史

以肱爲侍中領秘書監及齊受禪肱當日在直百僚陪位侍中當解璽肱佯不知曰有何公事傳詔云解璽授齊王肱曰齊自應有侍中乃引枕臥傳詔懼乃使稱疾欲取兼入肱曰我無疾何所道遂朝服出東掖門乃得車仍還宅是日遂以王儉爲侍中解璽旣而武帝請誅肱高帝曰殺之則成其名正應容之度外又以家貧乞郡辭旨抑揚詔免官禁錮五年永明中爲義興太守在郡不省雜事悉付綱紀曰吾不能作王者吏但能作太守耳歷都官尙書中書令侍中領新安王師求出仍爲吳興太守明帝謀入嗣位引朝廷舊臣肱內圖

止足且實避事弟淪時爲吏部尙書肱至郡致淪數斛酒遺書曰可力飲此勿豫人事建武四年徵爲侍中中書令不應遣諸子還都獨與母留築室郡之西郭明帝詔加優禮旌其素概賜床帳褥席奉以卿祿時國子祭酒何允亦抗表還會稽永元中詔徵肱允並不屆時東昏皆命迫遣會梁武帝起兵及建鄴平徵肱允並補軍諮祭酒皆不至及卽位詔徵肱爲侍中左光祿大夫開府儀同三司允散騎常侍特進右光祿大夫又並不屆仍遣領軍司馬王果敦譬肱肱謀於何允允欲獨高其節給曰興王之世安可久處明年六月肱輕出

詣闕自陳帝笑曰子陵遂能屈志詔以爲侍中司徒尙書令  
臄辭脚疾不堪拜謁乃角巾自輿詣雲龍門謝詔見於華林  
園乘小車就席明日乘輿出幸臄宅宴語盡歡臄固陳本志  
不許又固請自還迎母許之臨發輿駕臨幸賦詩餞別王人  
送迎相望於道到都敕材官起府於舊宅武帝臨軒遣謁者  
於府拜授詔停諸公事及朔望朝謁二年元會詔臄乘小輿  
升殿臄素憚煩及居臺鉉兼掌內臺職事多不覽以此頗失  
衆望其年母憂尋有詔攝職如故五年改授中書監司徒衛  
將軍是冬薨諡曰靖著書及文章行於世子諡位司徒右長

史次子諱不妄交接門無雜賓有時獨醉曰入吾室者但有  
清風對吾飲者唯當明月位右光祿大夫子哲美風儀舉止  
醜藉襟情豁朗爲士君子所重仕梁至廣陵太守侯景之亂  
因寓居焉仕陳歷吏部尙書中書令侍中司徒左長史卒諡  
康子

謝淪字義潔年七歲王景文見而異之言於宋孝武召見於  
人衆中淪舉止閑詳應對合旨帝悅詔尙公主景和敗事寢  
僕射褚彥回以女妻之厚爲資送性甚敏贍仕齊累遷中書  
侍郎衛軍王儉引爲長史雅相禮遇後拜吏部尙書明帝廢

鬱林領兵入殿左右驚走報淪淪與客圍碁每下子輒云其  
當有意竟局乃還齋臥竟不問外事明帝卽位淪又屬疾不  
知公事蕭謙以兵臨起之淪曰天下事公卿處之足矣且死  
者命也何足以此懼人後宴會功臣上酒尙書令王宴等興  
席淪獨不起曰陛下受命應天王宴以爲已力獻觴遂不見  
報上大笑解之坐罷晏呼淪共載欲相撫悅淪又正色曰君  
巢窟在何處晏初得班劍淪曰身家太傅裁得六人若何事  
頓得二十晏甚憚之謂江祐曰彼上人者難爲酬對加領右  
軍將軍兄肫在吳興論啟公事稽晚淪輒代肫爲啟上知非

肫事迹被問見原丞泰元年卒於太子詹事贈金紫光祿大  
夫諡簡子初肫爲吳興淪於征虜渚送別肫指淪口曰此中  
唯宜飲酒淪建武之朝專以長酣爲事與劉瑱沈昭畧交飲  
各至數斗淪子覽

覽字景滌尙齊錢唐公主拜駙馬都尉梁武平建鄴朝土王  
亮王瑩等數人揖自餘皆拜覽時年二十餘爲太子舍人亦  
長揖而已意氣閑雅視瞻聰明武帝目送良久謂徐勉曰覺  
此生芳蘭竟體想謝莊政當如此自此仍被賞遇天監元年  
爲中書侍郎掌吏部事項之卽真嘗侍坐受敕與侍中王暕

爲詩答贈其文甚工乃使重作復合旨帝賜詩云雙文既後  
進二少實名家豈伊爾棟隆信乃俱國華爲侍中頗樂酒因  
宴席與散騎常侍蕭琛辭相詆毀爲有司所奏武帝以覽年  
少不直出爲中權長史後拜吏部尙書出爲吳興太守中書  
舍人黃睦之家居烏程子弟專橫前太守皆折節事之覽未  
到郡睦之弟迎覽覽逐去其船杖吏爲通者自是睦之家杜  
門不出郡境多劫爲東道患覽下車肅然初齊明帝及覽父  
淪東海徐孝嗣並爲吳興號爲名守覽皆過之昔在新安頗  
衆斂至是遂稱廉潔時人方之王述卒於官贈中書令以上  
俱南

史本  
傳

袁湛字士深陽夏人祖耽晉歷陽太守父質琅邪內史並知  
名湛少與弟豹並爲從外祖謝安所知安以其兄子元女妻  
湛宋武起兵以爲鎮軍諮議參軍以從征功封晉寧縣五等  
男義熙十二年爲尙書右僕射武帝北伐湛兼太尉與兼司  
空尙書范泰奉九命禮拜授武帝帝冲讓湛等隨軍至洛陽  
住柏谷塢泰議受使未畢不拜晉帝諸陵湛獨至五陵展敬  
時人美之十四年卒贈左光祿大夫文帝卽位以后父贈侍  
中以左光祿大夫開府儀同三司謚曰敬公大明三年孝武

幸藉田經湛墓道遣使致祭增守墓五尸子君正為豫章內史遷吳郡太守

袁樞

君正子

字踐言美容儀性沈靜好學手不釋卷家本顯貴

貲產充給而樞獨處率素傍無交往非公事未嘗出遊榮利之懷淡如也侯景之亂樞往吳郡省父疾丁父憂時四方擾亂人求苟免樞居喪以至孝聞王僧辯平侯景鎮建鄴衣冠爭往造請樞杜門靜居不求聞達紹泰中歷吏部尚書吳興郡太守陳永定中徵為侍中掌選遷都官尚書掌選如故樞博學明悉舊章初陳武帝長女永嗣公主先適陳留太守錢

藏生子呂主及呂並卒於梁時武帝受命唯主追封至是將葬尚書請議加藏駙馬並贈呂官樞議凡尚公主必拜駙馬都尉魏晉以來因為瞻準蓋以玉姬之重庶姓之輕若不加其等級寧可合卷而酌所以假駙馬之位乃崇於皇女也今公子早薨伉儷已絕既無禮數致疑何須駙馬之授宜追贈亭侯時議以為當天嘉三年為吏部尚書領丹陽尹以葬父拜表自解詔令葬訖停宅視郡事服闋還職時僕射到仲舉雖參掌選事銓衡汲引並出於樞舉薦多會上旨謹慎周密清白自居文武職司鮮有遊其門者康帝即位遷尚書左僕



射卒謚曰簡懿有集十卷行於世弟憲

憲字德章幼聰敏好學有雅量梁武帝修建庠序別開五館其一館在憲宅西憲常招引諸生與之談論新義出人意表同輩咸嗟服焉大同八年武帝撰孔子正言章句詔下國學宣制旨義憲時年十四被召爲正言生祭酒到溉目送之愛其神采國子博士周宏正謂憲父君正曰賢子今茲欲策試不君正曰未敢令試居數日君正遣門客岑文豪與憲侯宏正會宏正將升講坐弟子畢集乃延憲入室授以麈尾令憲暨議時謝岐何妥在坐宏正謂曰二賢雖窮奧墮得無憚此

後生邪何謝乃遞起義端深極理致憲與往復數番酬對閑敏宏正謂妥曰忝卿所問勿以童幼期之時觀者重沓憲神色自若辯論有餘宏正亦起數難終不能屈因告文豪曰卿還諮袁吳郡此郎已堪見代博士矣時生從對策多行賄略文豪請具束脩君正曰我豈願用錢爲兒買第邪學司銜之及憲試爭起據難憲隨問抗答剖析如流到溉顧憲曰袁君正其有後矣及君正將之吳郡溉祖道於征虜亭謂君正曰昨策生蕭敏孫徐孝克非不解義至於風神器局去賢子遠矣尋舉高第以貴公子選尙南沙公主卽梁簡文帝女也大

同元年釋褐秘書郎遷太子舍人侯景寇逆憲東之吳郡尋  
丁父憂哀毀過禮陳武帝作相除司徒戶曹初謁遂抗禮長  
揖中書令王勸謂憲曰卿何矯衆不拜祿公憲曰於理不應  
致拜衛尉趙知禮曰袁生舉止詳中故有陳汝之風陳受命  
授中書侍郎兼散騎常侍太建三年累遷御史中丞羽林監  
時豫章王叔英不奉法度逼取人馬憲依事劾奏免叔英自  
是朝野嚴憚憲詳練朝章尤明聽斷至有獄情未盡而有司  
具法者卽伺間爲帝言之所申理甚衆嘗陪宴承香閣賓退  
後宣帝留憲與衛尉樊俊徙席山亭談宴終日帝謂俊曰袁

家故爲有人其見重如此自侍中改授南康內史遣吏部尙  
書憲以久居清顯累表自解任帝曰諸人在職屢有謗書卿  
處事已多可謂清白別相甄錄且勿致辭遷右僕射參掌選  
事先是憲長兄樞爲左僕射至是憲爲右僕射臺省目樞爲  
太僕射憲爲小僕射朝廷榮之及宣帝不豫憲與吏部尙書  
毛喜俱受顧命始興王叔陵之肆逆也憲指麾部分預有力  
焉後主被創病篤執憲手曰我兒尙幼後事委卿憲曰羣情  
喁喁冀聖躬康復後事之委未敢奉詔以功封建安縣伯領  
太子中庶子尋除侍中太子詹事及太子加元服行釋奠禮

憲表請解職不許尋給扶二人皇太子頗不率典訓憲手表  
陳諫十條皆援引古今言辭切直太子雖外示容納心無悛  
改後主欲立寵妃張貴妃子始安王爲嗣嘗從容言之吏部  
尙書蔡徵順旨稱贊憲厲色折之曰皇太子國家儲副億兆  
宅心卿是何人敢輕言廢立然是夏竟廢太子爲吳興王後  
主知憲有規諫之事答曰袁德章實骨鯁臣卽日詔爲尙書  
僕射禎明三年隋軍來伐隋將賀若弼進燒宮城北掖門兵  
衛皆散走朝士各藏唯憲侍左右後主謂曰我從來待卿不  
先餘人今日見卿可謂歲寒知松柏後凋也非唯由我無德

亦是江東衣冠道盡後主將避匿憲正色曰北兵之入必無  
所犯大事如此陛下安之臣願陛下依梁武見侯景故事以  
待之不從因下榻馳去憲從出後堂景陽殿後主投井中憲  
哭拜而出及至長安隋文帝嘉其雅操下詔以爲江表稱首  
授開府儀同三司昌州刺史開皇十四年授晉王廣府長史  
十八年卒時年七十贈大將軍安成郡公謚曰簡長子承家  
仕隋至秘書丞國子司業

以上俱南  
史本傳

後袁式字季祖陽夏人漢司徒滂之後父淵司馬昌明侍中式  
在南歷武陵王諮議參軍與司馬文思等歸姚興太常二年

歸國為上客賜爵賜夏子與司徒崔浩一面便盡國土之交  
 是時朝儀典章悉出於浩浩以式博於古事每所草創恒顧  
 訪之性長者雖羈旅飄泊而清貧守度不失士節時人甚敬  
 重之皆呼曰袁諮議延和三年衛大將軍樂安王範為雍州  
 刺史詔式與中書侍郎高允俱為從事郎中辭而獲免式沈  
 靖樂道周覽書傳至於詁訓倉雅偏所留懷作字釋未就以  
 天安二年卒贈豫州刺史諡肅子濟襲位魏郡太守政有清  
 稱加寧遠將軍子姪遂居頽川之陽夏

魏書本傳

唐劉元佐滑州匡城人少倜儻不自業為縣捕盜犯法吏笞辱  
 幾死乃亡命從永平軍稍為牙將太歷中李靈耀據汴州反

元佐乘其無備襲取宋州有詔以州遂隸其軍節度使李勉  
 即表署刺史德宗建中初進兼御史中丞充宋亳穎節度使  
 時李納叛李洧以徐州歸納急攻之詔元佐援洧大破納兵  
 斬首萬餘級東南饑漕乃運進圍濮州徇濮陽皆下再降其  
 守將遂通濮陽津遷檢校兵部尚書兼曹濮觀察淄青兗鄆  
 招討使汴滑都統副使李希烈反元佐與李勉等聯兵屯淮  
 汝數困賊帝在奉天垂意關東乃詔檢校尚書左僕射同中  
 書門下平章事希烈攻陳州元佐救之希烈走遂進取汴州

詔加汴宋節度使陳州諸軍行營都統元佐本名洽至是賜名以尊寵之入朝復兼涇源四鎮北廷兵馬副元帥檢校司徒性豪縱輕財好厚賞故下益用汴自李忠臣以來士卒驕不能自還至元佐彌甚其後殺帥長大鈔劫徂於利而然也元佐貴母尙在賢嬪人也常月織繩一端示不忘本數教敕元佐盡臣節或傳寺中佛軀汗流元佐自往大施金帛於是將吏商賈奔走輸金錢恐後十日元佐敕止藉所入得巨萬因以贍軍其權謫類若此初李納遣使至汴元佐得其陰謀故納最憚之卒年五十八贈太傅諡曰壯武

唐書藩鎮傳

韓宏滑州匡城人少孤依其舅劉元佐舉明經不中從外學騎射由諸曹試大理評事爲宋州南城將事劉全諒署都知兵馬使貞元十五年全諒死軍中思元佐以宏才武共立爲留後請監軍表諸朝詔檢校工部尙書充宣武節度副大使知節度事先是曲環死吳少誠與全諒謀襲陳許使數輩仍在館宏始得帥欲以忠自表於衆卽驅出少誠使斬之選卒三千會諸軍擊少誠敗之汴自劉士寧以來軍益驕及殺陸長源主帥勢輕不可制宏察軍中素恣橫者劉諤等三百人一日數其罪斬之牙門流血丹道宏言笑自如自是訖宏去

無一敢肆者李師古屯曹州以謀鄭滑或告師古治道矣兵且至請備之宏曰師來不除道也師古情得乃引去累授檢校司空同中書門下平章事宏以官與太原王鐸等詒書宰相恥爲鐸下憲宗方用兵淮西藉其重更授檢校司徒班諤上嚴綬以王師敗乃拜宏淮西諸軍行營都統使扞兩河而令李光顏烏重允擊賊宏不親屯遣子公武領兵三千屬光顏然陰爲逗撓計每諸將告捷輒索日不怡元濟平以功加兼侍中封許國公李師道誅宏大懼因請入朝冊拜司徒中書令以足疾命中人掖拜固願留京師帝崩攝冢宰俄出爲

河中節度使以病請還復拜司徒中書令卒年五十八贈太尉諡曰隱宏爲人莊重寡言罪殺人問法何如不自爲輕重沈謀勇斷故少誠師道等共憚之詔使至或驚侮不爲禮齊蔡平勢屈而後請覲然天子尊寵異等能以名位始終亦其天幸

韓公武字從偃起家衛尉主簿署宣武行營兵馬使以討蔡功授檢校左散騎常侍卿坊等州節度使深懼盛滿乞罷入爲右金吾將軍轉右驍衛大將軍性恭遜不以富貴自處先父暴卒贈戶部尚書諡曰恭子紹宗嗣

唐史本傳

充本名璿少亦依舅家李元爲河陽節度使署牙將元改昭  
義又從之元嘗謂賓佐曰充後當貴諸君必善事之未幾宏  
領宣武召主親兵元曰我知君舊矣吾兒不才無足累君者  
二女方幼以爲託遂辭去累授御史大夫宏峻法人人不自  
保充謹慎無少懈念宏在鎮久不入見天子身又得士不自  
安因請入宿衛宏許之不卽遣後因獵單騎走洛陽朝廷亮  
其節擢右金吾衛將軍轉大將軍斥軍士虛名不如令者七  
百人歷少府監鄜坊等州節度使穆宗立幽鎮魏復亂王承  
元以冀兵二千屯滑州朝廷恐冀兵相誑爲叛徙承元鄜坊

而授充檢校尙書左僕射爲義成軍節度使會汴軍逐李愿  
以李宥主留事帝謂充素爲汴士悅向詔節度宣武兼統義  
成討宥戰郭橋破之宥李質斬宥遂入汴初陳許李光顏亦  
奉詔討宥屯尉氏意先得汴欲俘掠以餌軍而汴監軍姚文  
壽亦欲納光顏充聞其謀馳至城下汴人望見充歡躍無復  
貳者始帝遣人問破賊期充對汴天下咽喉臣頗習其人然  
王師臨之一月可破方二旬卽克帝喜曰充料敵如神加檢  
校司空籍宥所脅爲兵者三萬悉縱之又責首亂者千餘斥  
出境令曰敢後者斬由是內外安堵汴人愛賴之卒年五十

五贈司徒諡曰肅充雖將家性儉節歷三鎮居處服玩如儒

生乘機決策無餘悔世推善將李元沒充為嫁二女周其

家唐書本傳府志云按劉元佐韓宏史皆稱滑州匡城人然韓文公作宏神道碑謂其先自潁川徙陽夏為陳之太

康太康之韓其稱蓋久自公始大著又謂宏父海娶鄉邑劉氏女夫人之兄曰司徒元佐文公宏同時人碑文自得其實

宜載康志也今按元史韓元善傳云唐贈司徒充以宣武軍節度使留鎮汴子孫遂為太康韓氏則宏與充不居太康可

知韓文公所云或宏之先本居太康而宏父居匡城及充之子孫復居太康也

宋沈倫初名義倫以諱省字順儀太康人少習三禮於高洛間

講學自給漢乾祐中白文珂鎮陝往依之與宣徽使管居潤

善薦辟宋太祖同州幕府繼署滑許宋三鎮從事掌留後財

貨以介聞太祖受禪召為戶部郎中奉使吳越歸奏便宜屬

揚泗間饑長史言郡中軍儲尚百餘萬皆陳腐儻以貸貧民

至秋收新廩公私俱利朝議難之太祖以問倫對曰國家以

至恩溥民自當感召和氣豈復慮意外邪上遽命發廩貸民

建隆三年遷給事中明年為陝西轉運使王師伐蜀改隨軍

水陸運使諸將入成都競取玉帛子女倫獨寓僧舍潔躬糲

食有獻珍異峻拒之東歸纔圖書數卷充篋而已上知之擢

為戶部侍郎樞密副使親征太原領大內都部署權留司三

司事開寶六年拜中書侍郎平章事集賢殿大學士兼提舉



荆南劍南水陸發運事零祀西洛以倫為東京留守兼大內都部署俄召赴行在令預大禮太宗初加右僕射兼門下侍郎有事太原復留守判開封府事師還論功加左僕射五年監修太祖實錄成賜襲衣金帶六年加開府儀同三司以疾請告明年坐與盧多遜同列不能覺察責降工部尚書落子繼宗職未幾致仕上念倫舊臣命復繼宗官以慰其心薨年七十九贈侍中諡恭惠繼宗字世卿廕補西頭供奉官加朝散大夫知浚儀縣轉屯田郎中至道末領淮南轉運有疾以將作監致仕東封起歷太僕光祿二少卿判三司勾院卒年

五十六女為真宗貴妃三子惟溫至秘書丞惟清內殿承制

惟恭將作監簿

宋史本傳

謝絳字希深其先陽夏人祖懿文為鹽官令葬富春遂家焉父清進士以文行稱直昭文館終太子賓客絳初以廕試校書郎登第知汝陰縣楊億薦其文召式擢秘閣校理通判太常禮院母憂服除遷太常博士尋通判常州疏陳水旱仁宗納之擢國史編修祠部員外郎直集賢院父老乞便養通判河南雖居外猶數論事權開封府判官值蝗變上言吏不稱職語極剴切郭后廢陳白華之詩以諷徙三司度支判官兵

部員外郎進聖治箴五篇父憂服除擢知判誥制流內銓吏部擬官舊視職田有無不問多寡以是不均絳爲覈其實以多寡爲差有名無實者皆不用人以為便改判太常禮院知禮儀事使契丹還調知鄧州引美陽堰水注鉗盧陂溉田三萬頃請修復召信臣六門堰未就而卒年四十六絳爲人修潔醜藉所至大興學舍在河南修國子學諸生自遠至者數百人好施宗族家無餘貲有文集五十卷子景初景溫景平景回景平好學終秘書丞景溫登進士歷京西淮南轉運使

宋史本傳

元韓克昌椿之子太康人以孝廉辟歷河南陝西一憲司掾尋進刑部臺省持正不撓擢刑部主事有兄弟五人爲盜法當死克昌曰弟從兄者也此不幾于族乎乃議宥最幼弟上可其言拜爲監察御史卒於官

韓元善字大雅汴梁之太康人唐檢校司空贈司徒充以宣武軍節度使兼統義成軍留鎮汴子孫遂爲太康韓氏父克昌至大間仕爲監察御史以論事有名聲元善由國子監生積分中程釋褐除新州判官累擢江南行臺監察御史歷中書左司郎中吏部侍郎吏部尙書僉樞密院事至正三年拜

中書參知政事五年遷大司農卿尋出為江南行御史臺中丞燕南肅政廉訪使九年召拜中書左丞同知經筵事十一年丞相脫脫奏事內庭以事關兵機而元善及參知政事韓鏞皆漢人使退避勿與俱由是遂與右丞王樞虎兒吐華同分省彭德以給餽餉十二年御史大夫也先帖木兒總兵討汝寧元善至衛輝以病卒元善性純正明達政體敷歷臺閣三十餘年遂躋丞轄以文學治才羽翼廟謨論議之際秉義陳法不徇向上官國是所在倚之以為重嘗以謁告侍親居家效范文正公遺規置田百畝為義莊以贍周貧族至正交

鈔初行賜近臣各二百錠元善復以買田六百畝為義塾延

名士以教族人子弟云 元史本傳

明王鈍字士魯元末隱居龍門教授洪武三年徵至京師授禮部主事擢吏部郎中歷大名府長沙府通判陞福建參議參政右布政撫麓川陞浙江左布政使丁艱歸上奪情陞戶部尚書上嘗稱王鈍張統以勸百僚文皇即位乞骸骨歸遂卒有司立祠祀之

淪字子清鈍季子永樂四年進士仁宗時遷鄭王府左長史數以禮諫王嘗擬荀卿成相篇撰十二章以獻語切與王不

合召改戶部郎中英宗卽位擢戶部右侍郎巡撫浙江有惠

政母喪起復入覲留攝部事尋以老乞歸卒

明史本傳

郭曾字師魯元末以春秋中河南鄉試授湖廣黃陂縣教諭

兵亂謝病歸隱明初經薦授磨勘司令從潁川侯傅友德征

西有功陞御史臺治書卒於官後以逆黨構連逮家屬妻王

氏捧遺像愬高皇一見曰此郭曾從傅友德征西有功者著

馳驛寧家

傅安字志道洪武末由縣吏授禮科給事中奉使西番羈留

十有三年備嘗艱苦執節不屈卒致西番款服永樂中始還

陞兵科右給事調禮科都給事中賜一品服以老病致仕著

有使遠傳

韓鐸字宜伯明於世務沈毅有幹濟識大體草創之日多所

建明洵歷省垣官至戶部侍郎一代之良也

以上俱舊志

顧佐字禮卿太康人建文二年進士除莊浪知縣端陽日守

將集官僚校射以佐文士難之持弓矢一發而中守將大服

永樂初入爲御史七年成祖在北京命吏部選御史之才者

赴行在佐預焉奉命招慶遠蠻督採木四川從北征巡視關

隘遷江西按察副使召爲應天尹剛直不撓吏民畏服人比

之包孝肅北京建改尹順天權貴人多不便之出爲貴州按察使洪熙元年召爲通政使宣德三年都御史劉觀以貪被黜大學士楊士奇楊榮薦佐公廉有威歷官並著風采爲京尹政清弊革帝喜立擢右都御史賜敕獎勉命察諸御史不稱者黜之御史有缺舉送吏部補選佐視事卽奏黜嚴體楊居正等二十人謫遼東各衛爲吏降八人罷三人而舉進士鄧棨國子生程富謁選知縣孔文英教官方瑞等四十餘人堪任御史帝使歷政三月而後任之居正等六人辨懇帝怒並諸爲吏者悉戍之旣而體自成所潛還京脅他賄爲佐所

奏且言體謀害已詔戮體於市帝北巡命偕尙書張本等居守還復敕令約束諸御史於是糾黜貪縱朝綱肅然居歲餘或告佐不理冤訴帝曰此必重囚教之命法司會鞠果千戶臧清殺無罪三人當死使人誣佐帝曰不誅清則佐法不行磔清於市八年秋佐有疾乞歸不許以南京右都御史熊概代理其事踰年而概卒佐疾良已入見帝慰勞之命免朝賀視事如故正統初考察御史不稱者十五人降黜之邵宗九載滿吏部已考稱亦與焉宗奏辨尙書郭璉亦言宗不應與在任者同考帝遂責佐而御史張鵬等復劾宗微過帝以鵬

朋欺並切責佐佐上章致仕去十一年九月卒佐孝友操履清白性嚴毅每旦趨朝小憩外廬立雙藤戶外百僚過者皆折旋避之入內直廬獨處小夾室非議政不與諸司羣坐人

稱為顧獨坐云然持法深論者以為病

明史本傳舊志佐卒賜祭葬萬歷三年鄭

撫王世貞奏請贈少保謚端肅立祠春秋祭

張忠字友直沉潛簡易不為阿隨授陝西嵐縣知縣當西南貢道往來旁午民不能堪忠調停處置人稍休息軍豪侵民田大為裁正親藩奪地稅猶在民奏請除稅蒞任六年以憂去民赴闕奏留上命服滿復任歷九載巡按御史奏留又九

載赴京考滿性不能事當路陞衡州府通判調鎮江尋致仕郭濟字澤民曾之孫中永樂戊子鄉試第一授定州訓導復補開州陞左春坊司諫轉梁府紀善改行人陞鎮江知府奉敕行事遇旱禱雨輒應屬有虎患為檄告神虎自沉於河民繪異政考最二次將九年病卒於官

郭緒字繼業太康人成化十七年進士使楚府御其饋授戶部主事督餉二十萬於陝西給軍主者以羨告悉還之歷遷雲南左參議時孟養宣撫司思祿與孟密宣撫司思揲因爭地構怨不已宏治十四年巡撫陳金承諾遣緒往諭緒單騎

從數人至南甸斬棘引繩以登復至一大澤土官以象輿至  
 緒乘之往行毒霧泥沙中凡數旬至孟賴去金沙江二舍手  
 自為檄使持過江諭以朝廷招徠意蠻人聞中國使猝至發  
 兵數萬夜渡江長戟勁弩環之數重從者懼請勿進緒弗聽  
 思祿既見檄曉以禍福又聞至者纔數人乃遣酋長來聽令  
 緒出敕諭宣示思祿繼至緒先敘其勞次白其冤然後責其  
 叛諸酋咸俛伏呼萬歲歸地納款擢四川督儲參政後以雲  
 南功加俸一級明年致仕歸

明史本傳

王節字仲禮九歲能文邑令崔敬大奇之妻以孫女中順天

壬午鄉試授陝西盤屋知縣即崔公鄰邑外兄弟相見甚懽

慈祥愛民時稱良吏三年卒於官吏民思之祀名宦以孫堽

貴贈右副都御史

安康字道靈體貌魁梧清介有守入太學中順天鄉試時詔

吏部選堪風憲者康與選當奏聞疾不能赴病愈謁選冢宰

惜之授陝西徽州知州力行教化多惠政卒於官

安仁宏治丙辰進士任承年知縣沈毅明察人不敢欺祖授

陝西徽州知州多惠政父吉推官三世皆有顯績

劉慶字元善任廣平府訓導調西安府有軍武姓者以父老

當代慶語主帥曰此子器識必大用宜愛惜以成其才主帥從之其人後至參議邊士嚮風九年陞密雲教諭肅府左長史致仕子湜中進士兩爲縣令以循良名陞南京戶部員外別宿蠹人咸服其能未幾卒父子皆有才名

王照字景陽中景泰癸酉鄉試任襄陽府同知廉介性成俸外無一毫染在郡九年宦橐惟敝衣數事而已陞福建都轉運同知嘆曰錢穀之數我何免爲不之任

師存智字汝愚聰察有幹才令桐城以能稱拜御史大著聲望總兵張洪征遼爲監軍有金帛之賜巡兩浙鹽按陝西風

裁凜然劉瑾下員外韓邦靖獄力救得不死闖人橫行獨畏師御史平生無苟交妄取卒於京不能殮信陽何中書買棺殮以歸

韓瑀字廷玉以明經任工部主事有才幹時營建北京多所經營中貴人紛競掎尅瑀中立其間無怨無德人服其調劑之能

王朝賢字立之嘉靖壬辰進士和厚質實言不出口初授大理評事遷寺正務以謹飭自持出知順德府委政同官而考其成郡人稱曰王佛歷陝西副使擢太僕卿出爲湖廣參政



醇謹而已不失爲長厚君子

師宗魯字秉哲由舉人任順天府定興知縣性醇謹事繼母孝姪幼孤撫養甚至仕於外姪廢舊業強半無所問析產聽其自取家僮竊首飾敗露戒勿認爲脫其罪與物無忤貧賤親舊恂恂然一體相待人以此多之

何維字承之美風儀善談論醇然有守爲山東冠縣知縣廉明仁恕時有莘縣城隍冠縣何郎之頌莘縣城隍神最靈顯故以相况擢南京戶部主事權揚州稅以清介著遷貴州思南知府執法不撓人多忌之因有中傷者公論惜焉

張涇字用敬爲諸生時富人某餽以數金堅不受強之不已乃受日後必以報任潛山訓導歸其人已死奠於墓舉金還其子曰爾翁厚意今以相報人以爲不負死者遷臨縣教諭子正蒙歲貢生孫崇德舉人修德甲辰進士自有傳

王埏字曰振資敏達文學冠一時師尙詔反邑無令立闔閭呼壯士理守禦有奸人謀內應畏埏不得發蕭同知馳至城守已備賊圍三日不能破乃解去

王朝獻字寵之以明經任遼海衛經歷雖居下位必行其志善雪枉抑人稱仁明受命權稅有不如額者曰此誤耳非匿

也釋之中貴人由河而上大擾人皆畏避朝獻迎諸河從容與言無所索而去攝朝城篆瑩然無所累人稱其廉

姬自修字子治曠達不拘小節知沙河縣邑衝疲調停有方大得民心嘗以修署銀市穀賑饑出俸代民完租部使者三薦其才有中傷之者罷歸

王汝訓字廷言沈靜端恪平生無非僻之舉任山東章邱縣知縣清慎御下吏畏民懷惜年不永未竟其志而歿

王埏字曰衡隆慶戊辰進士雄才偉度負匡濟畧爲給諫嶽立不阿累擢都御史撫甘肅屯科徵輸有策邊方戡之再巡

撫陝西會陝告歉埏借漕糧分貯孟津由舟接濟山陝河南全活數萬又請延慶二郡開墾荒田爲軍民永利致政家居好吟咏多修建邑治與隅取文峰造浮屠十三級創書院延師教親族子弟年八十三終賜祭葬恩廕

郭顯忠字同竹萬歷丁丑進士知桃源縣有異政紀治河功欽賞丁艱起陝西三原考前任績擢工科給事中侍經筵以論事忤內璫出爲漢中知府刑清政簡民頌其德遷分巡靖北道改湖北又改朔州以封事賜一品服色加山西布政考滿贈二代建坊敘邊功陞南京太僕寺卿乞休疏五上准致

仕長於詩有雲中吟楚遊草等集林下著效顰小草紀年譜  
崇禎元年卒賜祭葬

秦尙明字若湛萬歷己丑進士天性剛決落落難屈知蕭山  
宜興兩縣金矢屏絕擢戶部主事痛陳利害釐剔積弊遷陝  
西參政邊庭事績皆上關國計下利民生清勁之操始終如

一

杜文煥字明華萬歷丁未進士司計部持籌有方出守池州  
寧國二郡稱廉明陞山西參政壬戌賫表入賀時權璫用事  
上言宜親賢遠奸痛擊時事不報丁艱歸乙丑中旨數起煥

曰美官易得惡名難追卒不就生平清廉持重不詭不隨其  
卓識沉毅有過人者

張修德字鳳芝萬歷甲辰進士數齡授書穎悟非常日誦數  
千言初授南樂知縣真心實政吏民懷畏鄰封疑獄咸取決  
焉以憂去職後補寧津寧津爲瀛海巖壤有露刃稱王者修  
德以計擒之餘孽解散擢廣東道御史慷慨陳時事奸人側  
目出使蜀藩歸卒上愍之命論祭入鄉賢祠

郭世忠字蕙韓萬歷甲午舉人幼受易於兄太僕顯忠聰悟  
罕有其儔初授廣平府通判駐臨洛關扼京師通衢應接煩

大康縣志 卷之五  
費世忠處以暇豫民不苦役轉泰安知州東獄其屬境也每歲議廟不下數十萬人互相競擾世忠嚴行禁止定有科條民不敢犯會中貴謀祀東封以共給不備觸其怒遂解組歸王瑞麟字咸有萬歷戊午鄉薦沈博六籍尤精於書邑蠹崔姓受鄰驛金移派陽夏歲協八千金有奇里下驚擾麟率邑人白其事補林慮教諭臨晉知縣遷灤州知州多惠政卒於官

王榮寵字拙翁少而穎異試數冠軍入棘闈十四次不售以明經選授雒川知縣雒川告饑經畧孫傳庭檄豆草殺戶吏傳首雒川寵抗顏請命民得息肩雒東南接白水寇蜂午郿州兵使議盡殲之民驚匿山谷中乃爲文止兵親行綏勸所全無算調安邑循行阡陌減荒糧二萬餘不殊雒川政教云郭清字宇泰萬歷甲午舉人明斷有經濟才明末疏請兩臺築堡清野議雖不行後果亂人服其識

國朝

李善感字孕秀少博學善詩辭久困諸生年垂暮始兩闈聯捷初授平山知縣聞學諭王君喪久羈不歸乃資送之且致賻爲營葬計調醴陵未任卒所著有四書要旨繼述堂詩藏

於家

王輔運字林州順治丁亥進士初授內閣中書舍人奏罷屯  
 官等四款遷刑部四川司主事定律令清疑讞差理直隸獄  
 犯奏免秋刑以才品調禮部祠祭擢本部員外郎中議祀典  
 除張浚進于謙從祀時論臚之轉湖廣上荆南道荊州屬雲  
 南衝要每歲大兵更代供應煩鉅運獨任其勞官民不擾康  
 熙元年進勦西山殘寇圖穆傅三大將軍統禁旅及川陝河  
 南官兵凡十二萬運職任督運單騎屢入賊穴日夜催辦糧  
 餉相繼兵食以足二年奏捷三年入 覲四年復任改湖廣

提學道卒於官

許重華字松牖順治壬辰進士初授山陽知縣有誣命疑獄  
 歷年不決一見即得其狀再補懷集殘逆龐國振擁眾屠掠  
 身先士卒衝險追之賊盡歸誠遷冀州知州每盜賊竊發不  
 旋踵逮者已至稱神君焉擢臨洮知府地界邊陲人不知書  
 乃修椒山書院置十三經通鑑等書簡俊秀講肄其中糧多  
 積欠屬令坐繫者七人白上憲清覈設法抵補一時報完擢  
 溫處副使時海禁嚴民多失業癸丑入覲

上御便殿召朝覲官詢民疾苦華疏陳七事首以開界為請開海

二百里民皆懽躍舊有海防兵三千占民居因檄所屬修營房數百間兵民兩便又蠲荒賦減徵派補缺徭溫民肖像祀之家居謙退如布衣著有書紳集公餘草藏於家

張見龍字羽京壬辰進士除括蒼司李括在浙萬山中民多逋負惻然曰荒不蠲則賦不給舊欠未清新稅重困莫若蠲荒徵熟乃額督撫奏上得請括多疑獄辨其枉者釋之觀察使駁再四龍持益堅曰吾爲朝廷全無辜非與觀察爭意見也何盛氣相加爲自是人憚其風旨當時以爲廉明第一會司李缺裁補乘州知州州多巨猾煽民逋稅積八萬有奇設

法招致民無逋負丁艱歸服闋補靜海水陸交衝民苦牧馬厲禁遏之邊人不敢南牧俸滿擢祠祭司主事蒞事未幾卽告歸歲庚申康邑淫雨民不聊生力請當塗免歲輸半邑人感德爲立碑誌

魏觀颺字元賡以歲貢選授曲陽通判管轄倒馬固關龍泉三關事務鼎革之初地方甫定姜壤煽亂關外皆賊穴羣懷疑貳颺勅所轄嚴守備擒奸細百餘人黜者誅之餘皆結以恩義人心始定擢泉州府同知署惠安縣事撫按牒清丈地畝百姓驚匿颺條悉利害力請停止省加派萬金惠安民爲

立生祀丁艱起復補鎮江通判海賊入寇雉堞不完守令恐甚颺諭紳民分堞條整一日夜器具咸備寇至賴以無恙以疾告歸親友或勸之出笑而不答優游林下以壽終

石大品字萬有性至孝年十五博通經史試輒冠軍順治戊子拔貢授金谿知縣革除火耗令百姓自封投櫃屏一切交遊重修學宮朱陸祠歷任五載因母病告歸囊中惟圖書數卷而已林下三十年引掖後學戶外屢滿安貧樂道手不釋卷一時著作咸推之

柳正芳初任澠池教諭報最歷知兩縣擢雲南澂江知府興利除弊政績皆有可紀家居恬退樂善好施卒年七十五著有就正集

許維欽廣東樂昌知縣有善政辨誣枉興學校殲翁源大坑山寇韶州鎮兵譁於營倚山結陣欽單騎諭之帖然歸伍所著有瀧頭集集硯齋稿藏於家

王鑑歲貢生性孝友初考國子監學正遷工部司務白堂官捐舊稅絕火耗遷刑部主事轉員外郎察獄周詳多所平反陞戶部江南司郎中除高郵埭田七百餘頃民無賠累以疾

歸以上俱見府志

許定國字膚公號太神身長七尺膂力過人有寺鐘重千斤坐地衆議設機縣立定國獨以雙手舉起喘息不作因號爲許千斤初由行伍歷任山東遊擊以平白蓮教功陞副總兵崇禎七年甲戌二月七日流寇圍太康土城頽壞守具不備定國領儲將健兒立埤上連發數矢賊驚遁撫按疏薦陞寧武關總兵從鎮遼陽十六年授河南援勦總兵闖寇陷京定國駐睢陽誘殺高傑投誠

本朝隨

豫王南下爲正白旗固山提光祿大夫一等精奇尼哈番世襲

柳同春字太和體貌魁梧膽畧過人明末盜賊蜂起仗策從戎累立戰功守備繁塔調山西遊擊與賊戰屢有斬獲投誠

本朝授江西都司僉書康熙元年陞授江北狼山總兵官

柳生春同春弟康熙元年同春具奏補

御前三等侍衛陞二等拜他喇布勒哈番

張法棧字六三增廣生員有膽氣嘗曰秀才詎不能平亂耶順治三年隨征南大將軍貝勒王收復浙江授福建崇安縣知縣有善政時閩寇猖狂奉檄招撫悉平加陞招撫同知父病告歸



王淨字霖九康熙丁卯舉人任雲南南寧令政治嚴肅聽斷  
明允委訊霑益州疑獄立雪其冤總兵某縱兵橫出汙繩之  
以法不少貸以勞卒於官前尹晉江張丹颺銘其墓以仕學  
兼優稱之

孟沂字伯霖康熙甲子舉人初任江南潁上縣知縣廉明善  
斷士民帖服境故多徇民風氣獯獯沂履任一洗舊染謳歌  
載道尋以行取補刑工兩部主事屢著賢聲以病告歸卒於  
家

段舒字仁九少力學盛暑嚴寒中夜不輟康熙庚午舉於鄉  
丁丑成進士授安慶潛山令前任有盜案誣陷王小等七人  
仁九訪獲真寃金四等寃獄以白設義學識拔寒賤棘園校  
閱所取多知名士潛邑數被災請賑請加復借項煮粥全活  
無算士民有悅來集誦之詩行取離任卒於官

孔興唐康熙丙子舉人授山西寧鄉縣知縣到任五日卽舉  
修聖廟除公帑外捐銀數百督工興作半載告成寧邑屢遭  
大荒民多流亡額糧積欠甚多唐以俸銀千餘代民全完所  
有鹽丁規規悉請除革縣有青龍三交等鎮多虎患唐到任  
齋戒告山神患卽除邑民至今尸祝

郭維墉字升庵康熙癸巳舉人初任廣西桂平縣知縣時捕獲罪人梁某率有率誣墉鞠訊核實多所全活尋調上林縣桂民郊送有泣下者上林獐獍雜處每遇差與胥役多索擾墉度地遠近限以時日徭民稱便調邊未及三年以病卒於官

柳國勳字世臣賦性倜儻才氣卓犖以恩廕除山西襄垣縣知縣屢決疑獄有能聲陞汾州府同知尋擢湖北漢陽知府陞驛鹽道歷多善政商民爲立祠尸祝之雍正元年晉江西按察使以公事掣誤旋補刑工兩部郎中致政歸卒於家生平度量豁達家藏瑪瑙瓶素所珍愛爲家僮所碎畧無愠色人尤服其雅量云

鄭志鯨字荃齋號桐月性恬淡壬午登賢書己未成進士殿試入詞林以檢討用在翰院五載改外用授山西長子縣清慎自矢恤士愛民甲子丁卯壬申癸酉爲同考官所拔皆知名士調曲沃地當孔道值金川軍旅事往來驛遞供給無缺民復不擾升絳州知州撫憲保舉知府送京引

見奉

旨候陞未半載因公鑄紋改調北直內邱知縣鯨知數奇甘心義命以親老告終養解任歸里兩袖清風杜門不出同年復好蒞

任河南者避嫌不見惟與二三社友談論往事以敦舊好云  
柳霽字乾三甫冠捐州同知乾隆二年河東效用五年各署  
山東恩縣主簿議敘陞署武城縣丞十六年制府顧學卓異  
引  
見十八年春擢陞貴州開州知州州固巖邑需剔弊釐奸民知畏法  
且懷德焉歲餘以開州兼署修文縣事開修相距九十里山  
徑盤紆民有走訟者令各於所治受聽往來視事百姓莫不  
心服二十二年冬署安順府郎岱同知以開州事被議二十  
五年歸里次年二月恭逢

鑾輿西巡

駕賞給原品頂帶是年秋河南中牟之楊橋河決呈請自効工竣以  
督挑濬功報最奉

旨發往河南以河工同知補用借補儀封通判二年

題補開封下北河同知分轄祥陳蘭三縣河道在北河六年餘  
心力俱瘁未嘗一日不勤勞

王事也三十四年卓異引

見奉

旨選授浙江寧波府知府未蒞任卒

王九儀字聖璽孝友性成乾隆二十八年例授浙江布經歷  
署杭捕盜同知拿獲私造烏鎗巨案陞杭州捕盜同知丁父  
艱還里服闋補行引見旆告終養在途接母病信兼程抵家  
年四十餘鬚髮頽白家之人不能識也奉母十餘年終母事  
兄患癱症或勸入官曰兄弟如手足痛癢相關我何忍捨病  
兄而圖仕宦也兄故乃除湖南寶慶府理務同知管核保兵  
五百餘名教練技藝使有勇知方待民推心置腹秋毫無犯  
因解糧船公出數月將民引領望其歸如孩提之望父母元  
旦羣躋公堂遙拜及旋篋焚香叩接若久旱之得甘雨乾

隆五十九年調任常德府同知鎮算苗叛撫軍委解糧餉五  
日夜自常德抵鎮交卸旋委撫恤難民全活甚衆兼隨提督  
冒險各處核扎營壘復委軍營催釐官軍裝糧餉火藥毫無  
遺悞七月調赴辰州府軍營解夫三千名抵貴州銅仁府一  
帶探往貝子中堂大營交卸中堂嘉賞翎頂委管貴州湖南  
兩省全夫俄受瘴染病遣回鎮算調養忽逆苗圍城遂抱病  
帶領本管堡兵二百餘名晝夜防禦鎗炮齊施三晝夜逆苗  
始退病愈篤制憲伏深加獎憫勸令回辰州撫憲大營調養  
未數日病故事歲入

奏贈知府銜

初書一道 賞祭葬卹典攸隆廕襲子忠言

周龍章字雲臺誕生時其里有異空中如聞鼓吹聲歲久乃寂爲人雄毅寡言愛讀史冊乾隆庚午舉於鄉部試一等掾發河東補千總王倫忝事擒僞總兵丁士杰等五人陞守備戴廟鎮營租歲收錢糧係出民地查出豁免民頌德焉四十七年河決調用河工事竣陞河營都司尋擢游擊五十一年大饑請貸濟寧常平倉穀一千石散給兵卒營中賴以安全連年催趨糧船不受饋湖南糧船脫空私攜桅木查明揭報

以清正聞陞叅將楚豫川陝教匪滋事章統兵守沐二年調防楚江迺於要地堅築四砦身屯小江口以當其衝及賊入豫境河撫景燾調守盧氏寺坡鎮防護嚴密陝賊未敢侵掠河撫景陞湖督移鎮襄陽派章爲中軍由宜都一同進討抵歐家寨謀知張總鎮失利景督問機宜章曰當事不避難吾惟知以身報

國耳馳至鍾祥縣之白雲山前鋒遇賊交戰賊小卻旁有小山可窺賊虛實章請分兵先據俄賊衆大至後營已被賊圍軍叅將陣亡勢甚危急章開營出戰呼聲震地自卯至午賊大

潰官兵僅七千人奪旂百餘杆殺賊無算生禽賊頭張漢潮  
子景督繕摺首薦蒙

聖恩賞戴花翎追賊至荊州經畧額侯兩翼長楊少保皆資章謀畫  
章自請爲額侯前鋒景督壯之追賊至房縣之八道河策馬  
陷陣深入酣戰賊敗連越三山奪旂三百餘杆殺賊二千八  
生擒張漢潮妾皆章前鋒力也章乘勝追賊至陳家壩接戰  
勝之又追至花石岡連戰復勝之賊匪僅數百人遁入川省  
額侯入川勦賊景督留楚守禦章偶得疾十日不思飲食疾  
小愈謀報楊開甲等賊寇竹溪景督遣官問疾且探章意章

力疾見督願以本部兵迎敵景督含涕送壯其志而憫其疾  
也刻卽統兵前馳與呢游擊合兵拒戰賊仍折竄回陝後移  
鎮隕西蒿坪壩爲隕西四戶章察其形勢建策築邊牆一道  
長三里餘蒿坪始可守楊賊往來邊垣外不能入景督贈詩  
有西面長城賴有公之句嘉慶五年章方在漫川關距楊逆  
李逆乘虛攻蒿坪章往援帶弁兵二百屯駐上津總口賊衆  
突至勢甚危會恒帥統大軍至與賊酣戰章從後邀擊殺賊  
無數軍中稱福將焉敘補河標叅將六年正月冉逆突攻西  
川砦若守飛人請援大營兵僅三百恒觀察難之章曰賊若

來破西川入漫川扼我咽喉我雖欲救無及矣督兵往援至則冉逆北趨將逼我老營營中惟餘把總一馬兵四步兵八十四楊賊統衆十萬復至邊牆肆行焚掠火光燭天章乃厚賞平日之熟販進營巡更沿邊牆列火繩兩頭可燃火留一兵守寨餘兵帶越邊牆分丈坐守夜則徧燃火繩如星列漢楊冉兩逆驚疑西奔及回營恒觀察勞之曰武侯空城計復見於今矣險哉追賊破逆擒邊陲清謐題陞中鎮副將引

見記名以總兵用十四年以目疾告休章孝友性成及貴祿不逮養凡遇祭先之期無不流涕終日年八十一卒長子金堂舉人

歷署長葛鄆陵訓導尉氏滄川涉縣武安教諭次子滋堂  
東嶧縣縣丞三子培堂山東新店閘官

柳遂夏字子起寧波公需之子也性孝友睦親族由州同知借補陳橋主簿前隨父任留心治河及蒞任雅有父風星夜巡視不恤劬勞工賴以固民感其德立有清政碑後補山東德州州同舉卓異陞授沂州府通判有善政以老致仕卒於家

朱學海字瀛洲乾隆甲寅科舉人天性孝友處事剛決戊辰初任廣西太平府左州知州下車伊始卽創修書院己巳夏

大旱虔誠祈禱甘霖卽降時有虎患學海於城隍廟默祝虎  
遂渡河去守三載小民安業頌聲載道士民有異政集頌之  
以病告歸卒於家

補遺

唐袁利貞陽夏人湛之族孫官太常博士開曜元年春正月以  
立太子宴百官及命婦於宣政殿引九部伎及散樂自宣政  
門入利貞上疏以爲正寢非命婦宴會之地路門非娼優進  
御之所請命婦會於別殿九部伎自東西門入而停散樂上  
乃更命置宴於麟德殿賜利貞帛百匹事見唐史  
袁謹利貞族孫官蘇州刺史嘗曰所貴於名家者爲其世篤  
忠貞才行相繼故也卽此知其爲一代忠貞見唐史



太康縣志卷之五下

忠烈

晉

謝琰字瑗度弱冠以貞幹稱美風姿與從兄護軍澹雖比居  
不往來宗中子弟惟與才令者數人相接拜著作郎轉秘書  
丞累遷散騎常侍侍中苻堅之役安以琰有軍國才用出爲  
輔國將軍以精兵八千與從兄元俱陷陣破堅以勲封望蔡  
公尋遭父憂去官服闋除征虜將軍會稽內史頃之徵爲尚  
書右僕射領太子詹事加散騎常侍將軍如故又遭母憂朝  
廷疑其葬禮時議者云潘岳爲賈充婦宣城宣君誄云昔在

武侯葬禮殊倫伉儷一體朝儀則均謂宜資給葬禮悉依太傅故事先是王珣娶萬女珣弟珣娶安女並不終由是與謝氏有隙珣時爲僕射猶以前憾緩其事珣聞恥之遂自造輜輶車以葬議者譏之太元末爲護軍將軍加右將軍會稽王道子以爲司馬右將軍如故王恭舉兵假珣節都督前鋒軍事恭平遷衛將軍徐州刺史假節孫恩作亂加督吳興義興二郡軍事討恩至義興斬賊許允之迎太守魏郡還郡進討吳興賊邱庭破之又詔珣與輔國將軍劉牢之俱討孫恩恩逃於海島朝廷憂之以珣爲會稽內史都督五郡軍事本官

並如故珣旣以資望鎮越土議者謂無復東顧之虞及至郡無撫綏之能而不爲武備將帥皆諫曰強賊在海伺人形便宜振揚仁風開其自新之路珣曰苻堅百萬尙送死淮南况孫恩奔衄歸海何能復出若其復至正是天不養國賊令速就戮耳遂不從其言恩後果復寇浹口入餘姚破上虞進及邢浦去山陰北三十五里珣遣參軍劉宣之距破恩旣而上黨太守張虔石戰敗羣賊銳進人情震駭咸以宜持重嚴備且列水軍於南湖分兵設伏以待之珣不聽賊旣至尙未食珣曰要當先滅此寇而後食也跨馬而出廣武將軍桓寶爲

前鋒摧鋒陷陣殺賊甚多而塘路迤狹琰軍魚貫而前賊於艦中傍射之前後斷絕琰至千秋亭敗績琰帳下都督張猛於後斫殺馬琰墮地與二子肇峻俱被害寶亦死之後劉裕左里之捷生擒猛送琰小子混混劊肝生食之詔以琰父子隕於君親忠孝萃於一門贈琰侍中司空諡曰忠肅三子肇峻混肇歷驃騎參軍峻以琰勲封建昌侯及沒於賊詔贈肇散騎常侍峻散騎侍郎

謝邈字茂度父鐵永嘉太守邈性剛愎無所屈撓頗有理識累遷侍中時孝武帝觴樂之後多賜侍臣文詔辭義有不雅

者邈輒焚毀之其他侍臣被詔者或宣揚之故論者以此多邈後爲吳興太守孫恩之亂爲賊胡榮郗驃等所執賊逼令北面邈厲聲曰我不得罪天子何北面之有遂害之邈妻郗氏甚如邈先娶妾郗氏怨懟與邈書告絕邈以其書非婦人詞疑其門下生仇元達爲之作遂斥元達元達怒遂投孫恩并害邈兄弟竟至滅門

以上俱晉書本傳

謝純字景懋景仁弟也劉毅鎮江陵以爲衛軍長史南平相及王鎮惡襲毅時病佐史聞兵至駢還入府左右引軍欲還外解純叱之曰我人吏也逃欲安之及入毅兵敗衆散純

為人所殺

晉書本傳

南  
宋袁淑字陽源少有風氣年數歲伯父湛謂人曰此非凡兒至  
十餘歲為姑夫王宏所賞博涉多通不為章句學文采道豔  
從橫有才辯彭城王義康命為司徒祭酒義康不好文學雖  
外相禮接意好甚疎從母兄劉湛欲其附已而淑不為改意  
由是大相乖失淑乃賦詩曰種蘭忌當門懷璧莫向楚楚少  
別玉人門非植蘭所尋以久疾免官元嘉二十六年累遷尚  
書吏部郎其秋大舉北侵從容曰今當席卷趙魏檢玉岱宗  
願上封禪書一篇文帝曰盛德之事我何足以當之出為始

興王濬征北長史南東海太守淑始到府濬引見謂曰不意  
舅遂垂屈佐淑曰朝廷遣下官本以光公府望也還為御史  
中丞時魏軍南伐至瓜步文帝使百官議防禦之術淑上議  
其言甚誕淑喜誇每為時人所嘲始興王濬嘗送錢三萬餉  
淑一宿復遣取追謂為使人謬誤欲以戲淑淑與濬書曰聞  
之前志曰七年之中一與一奪義士猶或非之况密邇旬次  
何其哀益之亟也竊恐二三諸侯有以觀大國之政遷太子  
左衛率元凶將為逆其夜淑在直呼淑及蕭斌等流涕告以  
明旦當行大事望相與戮力淑斌並曰自古無此願加善思

劭怒斌懼曰謹奉令淑叱之曰卿便謂殿下真有是邪殿下幼時嘗患風或是疾動耳劭愈怒因問曰事當尅不淑曰居不疑之地何患不尅但旣尅之後爲天地所不容大禍亦旋至耳劭左右引淑衣曰此是何事而可言罷劭因起賜淑等袴褶又就主衣取錦裁三尺爲一段又中裂之分斌與淑及左右使以縛袴褶淑出還省繞床至四更乃寢劭將出已與蕭斌同載呼淑甚急淑眠終不起劭停車奉化門催之相續徐起至車後劭使登車辭不上劭命左右殺之於奉化門外槐樹下劭卽位追贈太常孝武卽位贈侍中太尉諡曰忠憲

公又詔淑及徐湛之江湛王僧綽下天興四家長給廩淑文

集傳於世諸子並早卒兄洵吳郡太守諡曰貞洵子顓

袁粲字景倩洵弟子也父濯揚州秀才早卒粲幼孤祖哀之

名之曰愍孫伯叔並當世榮顯而愍孫饑寒不足母瑯邪王

氏太尉長史誕之女也躬事績紡以供朝夕愍孫少好學有

清才隨伯父洵爲吳郡擁敝衣讀書足不踰戶其從兄顓出

遊要愍孫愍孫輒稱疾不動叔父淑雅重之語子弟曰我門

不乏賢愍孫必當復三公或有欲與顓婚顓父洵曰顓不堪

政可與愍孫婚耳愍孫在坐流涕起出早以操行見知宋孝

武卽位稍遷尙書吏部郎太子右衛率侍中孝建元年文帝諱日羣臣並於中興寺八關齋中食竟愍孫別與黃門郎張淹更進魚肉食尙書令何尙之奉法素謹密以白孝武孝武使御史中丞王謙之糾奏並免官大明元年復爲侍中領射聲校尉封興平縣子三年坐納山陰人丁承文貨舉爲會稽郡孝廉免官五年爲左衛將軍加給事中七年轉吏部尙書左衛如故其年皇太子冠上臨宴東宮與顏師伯柳元景沈慶之等並樽蒲愍孫勸師伯酒師伯不飲愍孫因相裁辱曰不能與後人周旋師伯見寵於上上常嫌愍孫以寒素陵之

因此發怒曰袁濯兒不逢朕員外郎未可得也而敢寒士遇物將手刃之命引下席愍孫色不變沈柳並起謝久之得釋出爲海陵太守廢帝卽位愍孫在郡夢日墜其胸上因驚尋被徵管機密歷吏部尙書侍中驍衛將軍愍孫峻於儀範廢帝保之迫使走愍孫雅步如常顧而言曰風雨如晦雞鳴不已明帝泰初元年爲司徒左長史南東海太守愍孫清整有風操自遇甚高嘗著妙德先生傳續嵇康高士傳後以自况又嘗謂周旋人曰昔有一國國中一水號曰狂泉國人飲此水無不狂唯國君穿井而汲獨得無恙國人旣並狂反謂國

主之不狂爲狂於是聚謀共執國主療其狂疾火艾針藥莫不畢具國主不任其苦於是到泉所酌水飲之飲畢便狂君臣大小其狂若一衆乃歡然我既不狂難以獨立比亦欲試飲此水矣幼慕荀奉倩爲人改名祭字景倩二年遷領軍將軍徙中書令領太子詹事三年轉尚書僕射尋領吏部五年加中書令又領丹陽尹祭負才尙氣愛好虛遠雖位任隆重不以事務經懷獨步園林詩酒自適家居負郭每杖策逍遙當其意得悠然忘反七年爲尚書令初祭忤於孝武其母候乘輿出負塼叩頭流血塼碎傷目自此後祭與人語有悞道

眇目者輒涕泣帶曰嘗疾母憂急晝寢夢見祭容色如生

與母語曰愍孫無憂將爲國家器不患沈沒但恐富貴終當傾滅耳母未嘗言及祭貴重恒懼傾滅乃以告之祭故自挹損明帝臨崩祭與褚淵劉劭並受顧命元徽元年丁母憂葬竟攝令親職加衛將軍不受性至孝居喪毀甚祖日及祥詔衛軍斷客二年桂陽王休範爲逆祭扶曳入殿詔加兵自隨府置佐吏時兵難危急賊已至南掖門諸將意沮咸莫能奮祭慷慨謂諸將帥曰寇賊已逼而衆情離阻孤子受先帝顧託本以死報今日當與諸護軍同死社稷因命左右被馬辭

色哀壯於是陳顯達等感激出戰賊即平殄事寧授中書監  
卽本號開府儀同三司領司徒以揚州解爲府固不肯移三  
年徙尙書令衛軍開府如故並固辭服終乃受命加侍中進  
爵爲侯又不受時粲與蕭道成褚淵劉秉遞日入直平決萬  
機粲開默寡言不肯當事主書每往諮決或高詠對之時立  
一意則衆莫能改素寡往來門無雜賓順帝卽位遷中書監  
司徒侍中如故蕭道成旣居東府故使粲鎮石頭粲素靜退  
每有朝命逼切不得已然後方就及詔移石頭卽便順旨時  
道成方革命粲自以身受顧託不欲事二姓密謀討之劉秉

宋氏宗室前湘州刺史王蘊太后兄子皆與粲結諸將帥黃  
回任侯伯孫曇瓘王宜興彭文之卜伯興等並與粲合昇明  
元年荊州刺史沈攸之舉兵道成自詣粲粲稱疾不見粲宗  
人袁遠以爲不宜示異同粲曰彼若劫我入臺便無辭以拒  
一如此不復得出矣時道成入屯朝堂秉從父弟領軍將軍  
韞入直門下省卜伯興爲直閣黃回諸將皆率軍出新亭粲  
尅日謀矯太后令韞伯興率宿衛兵討道成於朝堂回率軍  
來應秉侯伯等並赴石頭事泄先是道成遣將薛深蘇烈王  
天生等領兵戍石頭云以助粲實禦之也又令心腹王敬則



為直閣與伯興共總禁兵王蘊聞秉已奔歎曰今年事敗矣  
 乃狼狽率部曲向石頭薛深等據門射之蘊謂衆已敗乃便  
 散走道成以報敬則敬則殺韞并伯興又遣軍主戴僧靜向  
 石頭助薛深自倉門入時衆與彥節等列兵登東門僧靜分  
 兵攻府西門秉與兒踰城出衆還坐列燭自照謂其子景曰  
 本知一木不能止大廈之崩但以名義至此耳僧靜挺身暗  
 往奮刀直前斬之子景覺有異大叫抱父乞先死兵士人人  
 莫不隕涕衆曰我不失忠臣汝不失孝子仍求筆作啟云臣  
 義奉大宋策名兩畢今便歸魂墳壠永就山邱僧靜乃并寤

之齊永明元年武帝詔曰袁粲劉彥節並與先朝同獎宋室  
 沈攸之於景和之世特有乃心雖末節不終而始誠可錄歲

月彌往宜霑優隆於是並命改葬

南史本傳

明

李志義伯敬仲子也伯敬原籍直隸正定府藁城縣人任河  
 南提舉司署太康縣事遂家焉明建文時志義由貢生登仕

籍任直隸廣昌縣令

明屬山西

靖難兵至守義不屈墜城死妻亦

自縊名列廣昌忠烈祠遺子秉直今撞莊村五里口丁清崗

為邑中望族皆其苗裔也

補遺

張維世字海澄萬歷丙辰進士歷平陽知府捕治絳州奸猾

數十人遷副使累官右僉都御史代陳新甲巡撫宣府視事甫旬日坐失防削籍遣戍已而釋還崇禎十五年三月十二日逆闖屠陳州人情洶懼有議棄陳者急告知縣魏聚眾誓神諭以大義又陰察人心已變乃私鑄一古硯小兒拍手笑呵呵李闖死在太康坡暗投井中浚井得硯人乃定十八日賊薄南門挾僞示諭投降免殺守城者相顧不敢動維世曰給我也守亦死降亦死與其降而死不如堅守可冀一生卽死亦不失爲忠義鬼乃燃炮擊賊殺數人賊怒豎雲梯環攻矢石如蝟賊善鑿城穿穴數十丈置火藥其中名曰放獲每

擊城輒壞兩日一夜不絕聲維世立矢石間悉力以禦絕人敵樓中擊以順城炮燃萬人敵燒之投石中之賊死如山積我兵死者亦相枕籍人無生色十九日東南角敵樓失火烈焰冲天眾潰城遂陷賊突上執維世去自成責其不降維世曰我朝廷大臣義當守不濟則當死自成又言汝在陝西做官好能輸銀十萬可免死曰好官焉得銀自成剛之恭人李氏積薪室中與其子生員正誼先縱火後縊死焉正誼妾汪氏亦投井死兄弟子姪二十餘人皆被害

國朝定鼎詔錄節義時以維世無人故未蒙

卹典舊志

馮貞吉字湛元生而醇謹好讀書時人目之為書車登崇禎

甲戌進士授陝西富平縣知縣半載歸家居誦課外無他嗜

教子昌辰成名士晚歲衣食或至艱窘泊如也壬午三月逆

闖圍太康貞吉謂妻任氏曰吾讀書成進士受官爵義無生

理汝為婦人生死之際宜自審處任氏許之次日城破夫婦

同投廡下井死昌辰從焉舊志

魏祚永字嶠棠號永錫崇禎庚午亞魁沉靜寡言清介醇謹

居城邑如在山林非公事不至公門壬午三月逆闖圍城分

守南門及東門角陷歸家與兄祚泰及家人訣拜先祠坐室

中賊至曰汝魏舉人耶從吾當活汝祚永曰兄病吾不忍舍

兄而從賊賊怒殺之祚泰病在床見賊殺弟大哭且罵賊並

殺之泰字崑棠邑庠生善書能詩意氣傾一時崇禎十三年

大荒人相食出粟賑饑全活甚衆人每慕稱焉舊志

王來選與子體乾俱邑庠生闖寇陷城被執及體乾妻張並罵賊不屈而死有傳

郭明興萬曆甲子科舉人授陝西臨洮府推官值闖寇死之

袁九章舉人署鹿邑教諭崇禎丁丑鄉居遇寇率鄉勇死戰被殺

孫瑜璇舉人程鵬化舉人闖兵圍城死守弗懈城破殉於難

孫獻策舉人聶毓白貢生

郭武興

武舉

郭雲興

監生

曾省三

投井死以  
下俱生員

王發祥

罵賊支  
解死

王朝唐

墜子罵賊  
墜城死

姬履貞

同妻席氏  
不屈死

姬履順

刺賊被  
殺死

耿秉葵

府庠增生守父柩賊發  
火以磚擲賊投火死

郭進宗

素剛強負氣年七十猶持鎗  
闖賊殺死天寧寺後水中

郭震

進宗子守東門眾潰猶揮刃  
止之見勢危急自刎城上

郭士興

增生負氣節守南門迎戰  
被執同侯王言不屈死

郭舉興

庠生博通子史精明醫  
理城陷衣冠自縊庭中

郭勃興

舉孝行父病寒粥讓產  
於弟城破擊賊被鎗死

曾其量

有膽畧賊入城率眾  
巷戰不敵被鎗死

安我國

申貞蘊

王質彬

郭偉興

張澄

程雲翰

陳獻蓋

李調鼎

王曠

王樹采

李茂華

王世則

王榮登

石發祥

許國忠

許其芝

許永吉

許士龍

孟養純

孟冬

邵鏞

萬傑

程雲步

周之翰

杜亮采

張明世

王煥

邵燦祖

朱紹芳

張斗翱

李杜朋

姬廉

張瀾

張震世

郭榮興

程伯洪

耿觀光

張養浩

陳翌主

石鍾秀

馬濬

張昱

王翊運

王懋德

顧詔

姬履贄

毛三畏

程貞化

師藩封

張正範

葉楚秀

張駿聲

姬 卬

張王猷

張 鑄

張經世

馮昌觀

李王民

趙連璧

王文勳

萬 珂

丁一陽

王榮章

王榮黨

郭 栢

張鍾謙

王震亨

石呈祥

馬呈祥

孟承三

王榮禎

段鳳彩

婁大觀

丁自修

張正謨

顧 誥

李碧尋

王 章

師善誘

仝正志

康萬邦

王榮蟾

馮雲閣

朱廷旦

郭 燿

毛炳章

郭雲興

程雲翌

張 鎔

王榮闈

王景運

石一瓘

王榮闈

申 琮

袁克光

張寵翼

郭長明

祝南山

張 暹

王祚興

馬呈瑞

毛詩章

張正巳

李 慎

王之鵬

宋見采

馬猶龍

申如意

晉鍾岱

李毓秀

王莫禦

郭 杰

張悟元

王之麒

師貞度

褚廣居

陳趨召

魏光縉

耿爭光

韋明國

劉新桂

張克復

韋明世

王鍾美

郭宜興

石乾學

陳九疇

王述祖

王榮閣

馬賁如

劉湛源

陳元輔

馮復京

王自新

王廷獻

王敘基

袁尙勳

朱晉秦

師惟明

王恪

劉養中

朱瑤

李之棟

劉溥

鄭四皓

劉養和

姜振鷹

馬爲龍

李新坤

張液

曾其守

張鐸

石珠光

王丕基

馮翌

張爲珂

李性忠

張道化

康侯

秦尙友

同妻女  
自焚死



孔尙鯁

李耀

張孟實

張鑛

趙朗

張秉乾

耿鳳鳴

顧銓

孔允昌

李調元

郭炫

郭悔吉

李雲鶴

李時蕃

郭仁興

李爾禎

李望民

張秉坤

以下  
士民

王玉辰

王汝擢

張榮祖

魏祚升

李秀

魏祚益

曾約

曾純

曾其明

張濂

曾其昌

石毅品

王瑞鳳

李學成

朱羽騰

耿奎光

李培

王國才

王體元

劉養銳

張益

王瑞芝

李開心

張乾

韓介

吳德光

張恕行

顧惠

張廷翰

李斯知

劉瑄

張廷炳

唐元

劉范

郭固

石晶

何頴

郭維城

馬奮鳴

陳所見

石一璇

王來榮

晉之載

石可符

李九成

李三臺

李篤生

耿一樂

褚廣恩

張子縉

趙悅

雷化鯤

邵鐸

不知名者不能詳載

孔貞白

張鑠字右文陳州籍太康人廩膳生少負大志有經濟才崇  
 禎十七年二月以內閣范景文薦三月初一日召對中左門  
 陳三策首請太子監國南京擇耆臣為輔次搬運通粟次守  
 城要畧又條議十八款上命留覽召吏部以御史擬用旋因  
 時勢孔亟都門戒嚴奉兵部咨文招練曹濮等處義勇入衛  
 及途聞京師陷北面伏地痛哭南渡河馳赴漕督史可法欲  
 共圖興復可法卒乃歸里數椽茅屋自耕而食因號食牛先

生云府志

王永隆萬歷末由博士授中書舍人督催湖廣江西織造案

悉織戶賠苦卻例餽不受復命改內閣中書天啟時魏闖擅  
 權楊左慘死嘆曰科名如此吾尚何為遂告歸生平濶容好  
 施雅敬賢士崇禎庚辰大饑人相食待以舉火者十餘家甲  
 申聞變嘆曰此身義不可苟生乃北面拜痛哭謁祖墓數日  
 不食卒

尙孚展生員生明季壬午之亂逆闖攻太康城破賊黨劫掠  
 鄉村孚展同弟寧國府同知瞻展避賊於集北寨寨素有良  
 馬賊欲之給曰獻馬當免屠孚展兄弟謾罵之賊怒縱火攻  
 寨寨破兄弟被執罵不絕口賊支解之全家並遇害

王敏大善寨人亦有韜畧值明季流賊蜂起練鄉勇以保寨及闖寇至淮聞名欲援為羽翼不從賊怒率眾攻之寨破敬奮勇以鬪力盡被執闖曰從吾可免死敬曰吾寧為忠義鬼不作降賊人大罵不屈遂遇害補遺

國朝

楊達字三山順治元年恩貢授山西大同通判駐朔州姜壤叛州皆附賊偽檄至士民開於庭者數千欲擁之迎賊執義不從為賊斃殺事聞贈按察司僉事

賜祭廕弟選知縣府志

王曉字公旦由武庠保舉以平逆闖餘黨有功授軍前行營千總順治三年隨總兵范紹祖副將李必忠下温州所向無前守泰順羣賊數萬攻圍曉嬰城奮擊後援闕江東橋陣亡子塘尙襁褓未蒙恤典乾隆五十七年奉文谷查李知縣轉詳以其六世孫本昇廕襲恩騎尉世職

劉紹先

武生嘉慶元年湖北毛竹山打仗陣亡

王義

嘉慶三年陝西高家梁打仗陣亡

柳廷環

嘉慶四年陝西兩河口打仗陣亡

丁子坤

劉恒太

步文忠

朱永新 以上四人嘉慶元年湖北黃龍當打仗陣亡

王喜成

張國順

焦振邦

段文忠

趙鳴太

方玉林

雷法良

劉勳

劉子成

馮得保

陳起順

以上十一人嘉慶四年陝西高家梁打仗陣亡

文學

魏 袁準字孝尼以儒學知名注喪服經官至給事中準子冲字

景元光祿勳冲子耽

晉 袁山松少有才名博學有文章著後漢書百篇矜情秀遠善

音樂舊歌有行路難曲餅頗踈質山松好之乃文其辭句婉

其節制每因酣醉縱歌之聽者莫不流涕初羊曇善唱樂桓

伊能挽歌及山松行路難時人謂之三絕時張湛好為齋前

種松柏山松每出遊好令左右作挽歌人謂湛屋下陳尸山

松道上行殯山松歷顯位為吳郡太守孫恩作亂山松守滬

瀆城城陷被害

袁宏字彦伯侍中猷之孫也父勗臨汝令宏有逸才文章絕美少孤貧以運租自業謝尚時鎮牛渚秋夜乘月率爾與左右微服泛江會宏在舫中諷詠聲既清會辭又藻拔遂駐聽久之遣問焉答云是袁臨汝郎誦詩卽其詠史之作也尚傾率有勝致卽迎升舟與譚論申旦不寐自此名譽日茂尚爲安西將軍豫州刺史引宏參其軍事累遷大司馬桓溫府記室溫重其文筆專綜書記常爲東征賦及三國名臣頌從桓溫北征作北征賦皆其文之高者常與王珣伏滔同在溫坐

溫令滔讀其北征賦至聞所傳於相傳云獲麟於此野誕靈物以瑞德奚授體於虞者疚尼父之洞泣似實慟而非假豈一性之足傷乃致傷於天下其本至此便改韻珣云此賦方傳千載無容率爾今天下之後移韻從事於寫送之致似爲未盡滔云得益寫韻一句或爲小勝溫曰卿思益之宏應聲答曰感不絕於余心愬流風而獨寫珣誦味久之謂滔曰當今文章之美故當共推此生性彊正亮直雖被溫禮遇至於辯論每不阿屈故榮任不至與伏滔同在溫府府中呼爲袁伏宏心恥之每歎曰公之厚恩未優國士而與滔比肩何辱

之甚謝安常賞其機對辯速後安爲揚州刺史宏自吏部郎  
出爲東陽郡乃祖道於冶亭時賢皆集安欲以卒迫試之臨  
別執其手顧就左右取一扇而授之曰聊以贈行宏應聲答  
曰輒當奉揚仁風慰彼黎庶時人歎其率而能要焉宏見漢  
時傅毅作顯宗頌辭甚典雅乃作頌九章頌簡文之德上之  
於孝武太元初卒於東陽年四十九撰後漢紀三十卷及竹  
林名士傳三卷詩賦諫表等雜文凡三百首傳於世三子長  
超子次成子次明子明子有父風最知名官至臨賀太守

交苑  
傳

晉書

袁豹字士蔚好學博聞善談雅俗每商較古今兼以誦詠聽  
者忘疲爲御史中丞時鄱陽縣侯孟懷玉上母檀拜國大夫  
人有司奏許豹以婦人從夫爵懷玉父大司農綽見居列卿  
妻不宜從子奏免尙書右僕射劉柳等官詔並贖論後爲丹  
陽尹太尉長史義熙九年卒官以參伐蜀謀追封南昌縣五  
等子子淑

袁峻字孝高陳郡陽夏人魏郎中令渙之八世孫也早孤篤  
志好學家貧無書每從人假借必皆鈔寫自課日五十紙紙  
數不登則不止訥言語工文辭梁武帝雅好辭賦獻文章於

南闕者相望天監六年峻乃擬揚雄言箴奏之帝嘉焉賜東  
帛除員外郎散騎侍郎直文德學士省鈔史記漢書各為二  
十卷又奉敕與陸倕各製新闕銘云

南史文學傳

謝靈運安西將軍奕之曾孫而方明從子也祖元晉車騎將  
軍父瑛生而不慧位秘書郎早亡靈運幼便穎悟元甚異之  
謂親知曰我乃生瑛瑛兒何為不及我靈運少好學博覽羣  
書文章之美與顏延之為江左第一縱橫俊發過於延之深  
密則不如也從叔琨特加愛之襲封康樂公以國公例除員  
外散騎侍郎不就為琅邪王大司馬行參軍性豪侈車服鮮

麗衣物多改舊形制世共宗之咸稱謝康樂也累遷秘書丞  
坐事免宗武帝在長安靈運為世子中軍諮議黃門侍郎奉  
使尉勞武帝於彭城作撰征賦後為相國從事中郎世子左  
衛率坐輒殺門生免官宋受命降公爵為侯又為太子左衛  
率靈運多愆禮度朝廷唯以文義處之不以應實相許自謂  
才能宜參權要既不見知常懷憤惋廬陵王義真少好文籍  
與靈運情款異常少帝即位權在大臣靈運構扇異同非毀  
執政司徒徐羨之等患之出為永嘉太守郡有各名山水靈運  
素所愛好出守既不得志遂肆意遊遨徧歷諸縣動踰旬朔



理人聽訟不復關懷所至輒爲詩咏以致其意在郡一週稱疾去職從弟晦曜宏微等並與書止之不從靈運父祖並葬始寧縣并有故宅及墅遂移籍會稽修營舊業傍山帶江盡幽居之美與隱士王宏之孔淳之等放蕩爲娛有終焉之致每有一首詩至都下貴賤莫不競寫宿昔間士庶皆徧名動都下作山居賦并自注以言其事文帝誅徐羨之等徵爲秘書監再召不起使光祿大夫范泰與書敦獎乃出使整秘閣書遺闕又令撰晉書粗立條流書竟不就尋遷侍中賞遇甚厚靈運詩書皆兼獨絕每文竟手自寫之文帝稱爲一寶既

自以名輩應參時政至是唯以文義相接每侍上晏談賞而已王曇首王華殷景仁等名位素不踰之並見任遇意既不平多稱疾不朝直穿池植援種竹樹果驅課公役無復期度出郭遊行或一百六七十里經旬不歸既無表聞又不請急上不欲傷大臣諷旨令自解靈運表陳疾賜假東歸將行上書勸伐河北而游娛晏集以夜續晝復爲御史中丞傅隆奏免官是歲元嘉五年也靈運既東與族弟惠連東海何長瑜潁川荀雍太山羊璿之以文章賞會共爲山澤之遊時人爲之四友因祖父之資生業甚厚奴僮旣衆義故門生數百鑿

山浚湖功役無已尋山涉嶺必造幽峻巖嶂數十重莫不備  
盡登躡常着木屐上山則去其前齒下山去其後齒嘗自始  
寧南山伐木開徑直至臨海從者數百臨海太守王琇驚駭  
謂爲山賊未知靈運乃安又要琇更進琇不肯靈運贈琇詩  
曰邦君難地嶮旅客易山行在會稽亦多從衆驚動縣邑太  
守孟顓事佛精懇而爲靈運所輕嘗謂顓曰得道應須慧業  
丈人生天當在靈運前成佛必在靈運後顓深恨此言又與  
王宏之諸人出千秋亭飲酒保身大呼顓深不堪遣信相聞  
靈運大怒曰身自大呼何關癡人事會稽東郭有回踵湖靈

運求洪以爲田文帝令州郡履行此湖去郭近水物所出百  
姓惜之顓堅執不與靈運旣不得回踵又求始寧休隍湖爲  
田顓又固執靈運謂顓非存利人政慮洪湖多害生命言論  
傷之與顓遂隙因靈運橫恣表其異志發兵自防露板上言  
靈運馳詣闕上表自陳本末文帝知其見誣不罪也不欲復  
使東歸以爲臨川內史在郡遊放不異永嘉事敗有司奏收  
之文帝詔於廣州棄市時元嘉十年年四十九所著文章傳  
於世子鳳坐靈運徙嶺南早卒

謝惠連方明子年十歲能屬文族兄靈運加賞之云每有篇

章對惠連輒得佳語嘗於永嘉西堂思詩竟日不就忽夢見惠連卽得池塘生春草大以爲工常云此語有神功非吾語也本州辟主簿不就惠連先愛幸會稽郡吏杜德靈及居父憂贈以五言詩十餘首乘流遵歸路諸篇是也坐廢不豫榮位尙書僕射殷景仁愛其才言次白文帝言臣小兒時便見此文而論者云是惠連其實非也文帝曰若此便應通之元嘉七年方爲司徒彭城王義康法曹行參軍義康修東府城城塹中得古冢爲之改葬使惠連爲祭文留信待成其文甚美又爲雪賦以高麗見奇靈運見其新文每日張華重生不能易也文章並行於世年三十七卒旣早亡輕薄多尤累故官不顯無子惠連弟惠宣位臨川太守

南史本傳

南

宋謝莊字希逸七歲能屬文及長韶令美容儀宋文帝見而異

之謂尙書僕射殷景仁領軍將軍劉湛曰藍田出玉豈虛也哉爲隨王誕後軍諮議領記室分左氏經傳隨國立篇製木方丈圖山川地土各有分理離之則州郡殊別合之則寓內爲一元嘉二十七年魏攻彭城遣尙書李孝伯與鎮軍長史張暢語孝伯訪問莊及王微其名聲遠布如此二十九年除太子中庶子時南平王鑠獻赤鸚鵡普詔羣臣爲賦太子左

衛率袁淑文冠當時作賦畢示莊及見莊賦歎曰江東無我  
卿當獨秀我若無卿亦一時之傑遂隱其賦元凶殺立轉司  
徒左長史孝武入討密送檄書與莊令加改正宣布之莊遣  
腹心門生具慶奉啟事密詣孝武陳誠及帝踐祚除侍中時  
魏求通互市上詔羣臣博議莊議以為拒而觀釁有足表強  
驃騎竟陵王誕當為荊州徵丞相荊州刺史南郡王義宣入  
輔義宣固辭不入而誕便尅日下船莊以丞相既無入志而  
驃騎發便有期如似欲相逼切帝乃申誕發日義宣竟亦不  
下孝建元年遷左將軍莊有口辯孝武嘗問顏延之曰謝帝

逸月賦何如答曰美則美矣但莊始知隔千里今共明月  
召莊以延之答語語之莊應聲曰延之作秋胡詩始知生為  
久離別沒為長不歸帝撫掌竟日又王元謨問莊何者為雙  
聲何者為疊韻答曰元謨為雙聲礮礮為疊韻其捷速如此  
初孝武嘗賜莊寶劍莊以與豫州刺史魯爽後爽叛帝因晏  
問劍所在答曰昔以與魯爽別竊為陛下杜郵之賜上甚悅  
當時以為知言於時搜才路狹莊表陳求賢之義曰臣聞功  
傾魏后非特照車之珍德柔秦客豈徒秘璧之貴隆陂所漸  
成敗之由何嘗不興資得才替因失士故楚書以善人為寶

虞典以則哲爲難而進選之舉既墮中代登造之律未聞當  
今必欲豐本康務庇人濟俗匪更滌蕪奚取九成夫才生於  
時古今豈貳士出於世屯泰焉殊升歷中陽英賢起於徐沛  
受籙白水茂異出於荆宛寧一都智之所產七嶼愚之所育  
實遇與不遇用與不用耳今大道光亨萬務俟德而九服之  
曠九流之艱提鈞懸衡委之選部一人之鑒易限天下之才  
難源以易限之鑒鏡難源之才使國罔遺賢野無滯器其可  
得乎昔公叔登臣管仲升盜趙文非私親疎祁奚豈諂讐比  
於茹茅以彙作範前經舉爾所知式昭往牒且自古任薦宏

明賞罰成子舉三哲而身致魏輔應侯任二世而已捐秦相  
白季稱冀缺而疇以田萊張勃進陳湯而坐之弛翁此則先  
事之盛準亦後王之彝鑒臣謂宜普命大臣各舉所知以付  
尙書依分詮用若任得其才舉主延賞有不稱職宜及其坐  
重者免黜輕者左遷被舉之身加以禁錮年數多少隨愆議  
制若犯大辟則任者刑論又政平訟理莫先親人親人之要  
實歸守宰故黃霸蒞潁川累稔杜畿居河東歷載或就加恩  
秩或入崇暉寵今蒞任之職宜遵六年之限進得章明庸惰  
退得人不勤勞如此則上靡棄能下無浮謬考績之風載泰

薪樵之歌克昌初文帝世限年三十而仕郡縣六周乃選代  
刺史或十年餘至是皆易之仕者不拘長少蒞人以三周爲  
滿宋之善政於是乎衰是年拜吏部尙書莊素多疾不願居  
選部與大司馬江夏王義恭牋自陳兩脇癰疾殆與生俱一  
月發動不減兩三每痛來逼心氣餘如縊利害數年遂成痼  
疾岷岷惛惛常如行尸眼患五月來便不復得夜坐恒閉帷  
避風晝夜惛惛爲此不復得朝修諸王慶弔親舊今之所止  
唯在小閣下官徵命於天下至輕在已不能不重家世無年  
亡高祖四十曾祖三十三亡祖四十七下官新歲便四十五

加以疾患如此當復幾時八年當申前請以死自固願侍坐  
言次賜垂接助三年坐疾多免官大明元年起爲都官尙書  
上時親覽朝政慮權移臣下以吏部尙書選舉所由欲輕其  
勢力二年詔吏部尙書依部分置并詳省閑曹又別詔太宰  
江夏王義恭曰吏部尙書由來與錄共選良以一人之識不  
辯洽通兼與奪威權不宜專一故也於是置吏部尙書二人  
省五兵尙書莊及度支尙書顧顓之並補選職遷左衛將軍  
加給事中時河南獻舞馬詔羣臣爲賦莊所上甚美又使莊  
作舞馬歌令樂府歌之五年又爲侍中領前軍將軍時孝武

大夏縣志 卷之五  
出行夜還敕開門莊居守以榮信或虛須墨詔乃開上後因  
宴從容曰卿欲效邳君章邪對曰臣聞蒐巡有度郊祀有節  
盤於游田著之前誠陛下今蒙犯塵露晨往宵還容致不逞  
之徒妄生矯詐臣是以伏須神筆六年又為吏部尚書領國  
子博士坐選公車令張奇免官事在顏師伯傳後除吳郡太  
守前廢帝卽位以為金紫光祿大夫初孝武寵姬殷貴妃薨  
莊為誅言贊軌堯門引漢昭帝母趙婕妤堯母門事廢帝在  
東宮銜之至是遣人詰莊曰卿昔作殷貴妃誅知有東宮不  
將誅之孫奉伯說帝曰死是人之所同政復一往之苦不足

為困莊少長富貴且繫之尙方便知天下苦劇然後殺之未  
晚帝曰卿言有理繫於左尙方明帝定亂得出使為赦詔莊  
夜出署門方坐命酒酌之已微醉傳詔停待詔成其文甚工  
後為尋陽王師加中書令散騎常侍尋加金紫光祿大夫給  
親信二十人卒贈右光祿大夫諡憲子所著文章四百餘首  
行於世五子颺臯顯崧淪世謂莊名子以風月景山水颺位  
晉平太守女為順帝皇后追贈金紫光祿大夫

南齊  
謝朓字元暉少好學有美名文章清麗為齊隨王子隆鎮西  
功曹轉文學子隆在荊州好辭賦朓尤被賞不捨日夕長吏

王秀之以朏年少相動欲以啟聞朏知之因事求還道中爲詩寄西府曰常恐鷹隼擊時菊委嚴霜寄言尉羅者寥廓已高翔是也仍除新安王中軍記室朏牋辭子隆時荊州信去倚待朏執筆便成文無點易以本官兼尙書殿中郎隆昌初敕朏接北使朏自以口訥啟讓見許明帝輔政以爲驃騎諮議領記室掌霸府文筆又掌中書詔誥轉中書郎出爲晉安王鎮北諮議南東海太守行南徐州事啟王敬以反謀上甚賞之遷尙書吏部郎朏上表三讓中書疑朏官未及讓以問國子祭酒沈約約曰宋元嘉中范曄讓吏部朱修之讓黃門

蔡興宗讓中書並三表詔答近代小官不讓遂成恒俗恐有乖讓意王藍田劉安西並貴重初不自讓今豈可慕此不讓邪孫興公孔顛並讓記室今豈可三署皆讓邪謝吏部今授超階讓別有意豈關官之大小搗謙之美本出人情若大官必讓便與詣闕章表不異例旣如此謂都非疑朏讓優答不許朏善草隸長五言詩沈約嘗云二百年來無此詩也敬皇后遷附山陵朏撰哀策文齊世莫有及者東昏失德江祜欲立江夏王寶元末更回惑與弟祀密謂朏曰江夏年少脫不堪不可復行廢立始安年長入纂不乖物望非以此要富貴



只求安國家爾遙光又遣親人劉渢致意於眇眇自以受恩  
明帝不肯答少日遙光以眇兼知衛尉事眇懼見引卽以祏  
等謀告左與盛又說劉暄曰始安一旦南面則劉渢劉晏居  
卿今地但以卿爲反覆人爾暄陽驚馳告始安王及江祏始  
安欲出眇爲東陽郡祏固執不與先是眇常輕祏爲人祏常  
詣眇眇因言有一詩呼左右取旣而便停祏問其故云定復  
不急祏以爲輕已後祏及弟祀劉渢劉晏俱候眇眇謂祏曰  
可謂帶三江之雙流以嘲弄之祏轉不堪至是搆而害之詔  
暴其過惡收付廷尉又使御史中丞范岫奏收眇下獄死時

年三十六臨終謂門賓曰寄語沈公君方爲三代史亦不得  
見沒初眇告王敬則反敬則女爲眇妻常懷刀欲報眇眇不  
敢相見及當拜吏部謙挹尤甚尙書郎范縝嘲之曰卿人才  
無慙小選但恨不可刑於寡妻眇有愧色及臨誅嘆曰天道  
其不可昧乎我雖不殺王公王公因我而死眇好獎人才會  
稽孔顛粗有才筆未爲時知孔珪嘗令草讓表以示眇眇嗟  
吟良久手自折簡寫之謂珪曰士子聲名未立應共獎成無  
惜齒牙餘論其好善如此眇及殷叡素與梁武以文章相得  
帝以大女永興公主適叡子鈞第二女永世公主適眇子謀

及帝爲雍州二女並暫隨母向州及武帝卽位二主始隨內  
還武帝意薄謨又以門單欲更適張宏策子策卒又以與王  
志子誣而謨不堪歎恨爲書狀如詩贈主主以呈帝甚蒙矜  
歎而婦終不還尋用謨爲信安縣稍遷王府諮議時以爲沈  
約早與朶善爲制此書云

南史本傳

謝超宗靈運孫隨父鳳嶺南元嘉末得還與慧休道人來往  
好學有文辭盛得名譽選補新安王子鸞國常侍王母殷淑  
儀卒超宗作誄奏之帝大嗟賞謂謝莊曰超宗殊有鳳毛靈  
運復出時右衛將軍劉道隆在御坐出候超宗曰聞君有異

物可見乎超宗曰懸磬之室復有異物耶道隆武人無識正  
觸其父名曰且侍宴至尊說君有鳳毛超宗徒跣還內道隆  
謂檢覓見鳳毛至闔待不得乃去泰始中爲尙書殿中郎二  
年都令史駱宰議策秀孝格五問並得爲上四三爲中二爲  
下一不第超宗議不同詔從宰議齊高帝爲領軍愛其才衛  
將軍袁粲聞之謂高帝曰超宗開亮善可與語取爲長史臨  
淮太守粲誅高帝以超宗爲義興太守昇明二年坐公事免  
詣東府門自通其日風寒高帝謂四坐曰此客至使人不衣  
自暖矣超宗旣坐飲酒數盃辭氣橫出高帝對之甚歡及齊

受禪為黃門郎有司奏撰郊廟歌上敕司徒褚彥回侍中謝  
 朏散騎侍郎孔珪大學博士王暄之聰明學士劉融何法圖  
 何曇秀作者凡十人超宗辭獨見用為人恃才使酒多所陵  
 忽人每忌之卒以此取禍以上南史

南

梁謝微字元度美風采好學善屬文位兼中書舍人與河東裴

子野沛國劉顯同官友善時魏中山王元略還北梁武帝踐  
 阼於武德殿賦詩三十韻限三刻成微二刻便就文甚美帝  
 再覽焉又為臨汝侯猷製放生文亦見賞於世後除尚書左  
 丞及昭明太子薨帝立晉安王綱為皇太子將出詔唯召尚

書右僕射何敬容宣惠將軍孔休源及微三人與議微時年  
 位尚輕而任遇已重後卒於北中豫章王長史南蘭陵太守

文集二十卷

梁書

謝舉字言揚幼好學與兄覽齊名年十四嘗贈沈約詩為約  
 所賞弱冠丁父憂幾致毀滅服闋為太常博士與兄覽俱預  
 元會江淹一見並相欽挹曰所謂馭二龍於長塗者也為太  
 子家令掌管記深為昭明太子賞接祕書監任昉出為新安  
 郡別舉詩云詎念耄嗟人方深老夫托其屬意如此梁武嘗  
 訪舉於覽覽曰識意過臣甚遠唯飲酒不及於臣帝大悅尋

除安成郡守母往於郡喪辭不赴歷位左戶部尙書遷掌吏部尙書舉祖莊父滄兄覽並經此職前代少比舉尤長元理及釋氏義爲晉陵郡時常與義學僧遞講經論徵士何允自虎邱山出赴之其盛如此先是北度人盧廣有儒術爲國子博士於學發講僕射徐勉以下畢至舉造坐屢折廣辭理道邁廣深歎服仍以所執麈尾斑竹杖滑石書格薦之以沉重席焉加侍中遷尙書右僕射大同三年出爲吳郡太守先是何敬容居郡有美績世稱爲何吳郡及舉爲政聲跡略相比曾要何徵君講中論何難以巾褐入南門乃從東園進致詩

往復爲虎邱山賦題於寺入爲侍中太子詹事翊左將軍舉父滄齊時終此官累表乞改敕不許後遷尙書僕射侍中將軍如故舉雖屢居端揆未嘗肯預時政保身固寵不能有所發明因疾陳解救輒賜假并敕處方加給上藥其恩遇如此侯景來降帝詢訪朝臣舉及朝士皆請拒之帝從朱异言納之以爲景能立功趙魏舉等不敢復言大清三年遷尙書令卒於內臺上日舉非止歷官已多亦人倫儀表久著公望悵恨未授之可贈侍中衛將軍開府儀同三司舉宅內山齋捨以爲寺泉石之美殆若自然臨川始興諸王常所游踐邵陵

王綸於婁湖立園廣讌酒後好聚眾賓冠手自裂破投之唾  
壺皆莫言舉嘗預宴王欲取舉幘舉正色曰裂冠毀冕下宮  
莫敢聞命拂衣而退王屢詔不返甚有慙色舉託情元勝尤  
長佛理注淨名經常自講說有文集二十卷子嘏

梁書

謝嘏字含茂風神清雅頗善屬文仕梁為太子中庶子建安  
太守侯景之亂之廣州依蕭勃勃敗在周迪門後依陳寶應  
寶應平方詣闕歷侍中中書令都官尚書卒諡曰光子有文  
集行於世子儼位侍中御史中丞太常卿位尚書僕射

陳書

北齊

袁爽字元明陳郡人梁司空昂之孫也父君方梁侍中爽涉

學有文詞蕭莊時以侍中奉使貢莊敗除琅邪王儼大將軍

諸議入館遷大中大夫

北齊書本傳

唐

袁朗父樞仕陳為尚書左僕射朗在陳為秘書郎江總尤器  
之後主聞其才詔為月賦灑然無留思後主曰謝莊不得獨

美於前矣復詔為芝草嘉蓮二頌歎賞尤厚累遷太子洗馬

德教殿學士陳亡入隋歷尚書儀曹郎武德初隱太子與秦

王齊王相傾爭致名臣以自助朗時為齊王文學從父弟承

序亦有名王召為文學館學士朗累封汝南縣男再轉給事

中卒太宗為廢朝一日謂高士廉曰朗任淺而性謹厚使人

悼惜明遠祖滂為漢司徒自滂至朗凡十二世其間位司徒  
 司空者四世淑顓察皆死宋難昂著節齊梁時朗自以中外  
 人物為海內冠雖琅邪王氏踵為公卿特以累朝佐命有功  
 鄙不為伍朗孫誼神功中為蘇州刺史承序為齊王元吉府  
 學士府廢補建昌令治尚慈簡吏民懷德高宗為晉王太宗  
 崇選僚屬問梁陳名臣子弟誰可者岑文本曰昔陳亡百司  
 奔散有袁憲者朝服立後主傍白刃不避也王世充篡隋羣  
 臣表勸進而憲子給事中承家稱疾不肯署今其少子承序  
 風操清亮無愧先烈帝乃詔拜晉王友兼侍讀加宏文館學

士卒 唐書文藝傳

明 曾省信字抱一萬歷己未進士耐於古學讀書有靜悟厭辭  
 華言笑不苟崇禎癸酉禮曹奉旨正文體以其經墨為中州  
 鄉場楷模所著有芝香居詩忠孝文集刪正大全傳世卒贈

戶部主事 見府志

國朝 耿繡彝字用中康熙癸未進士性行端謹學問優長初授湖  
 廣臨湘縣知縣政尚寬平崇重禮教士習為之不變以卓薦  
 補禮部儀制司主事尋以疾告歸數掌書院教勤講習精訓  
 課成就多人家居不廢吟詠所著有四書遵註性理解孝經

集要行於世

耿帝德字亦夔明季隨父避難河朔年十歲父病不食亦不食主人異之謂爾童子何自苦曰父不食我能下咽乎十八食餼於庠聞孫徵君講學蘇門負笈往遊三十薦於鄉與睢陽湯孔伯嵩陽耿逸菴友善同以理學知名念父春秋高無意公車家居雖盛暑必衣冠端坐從遊甚眾初授商城教諭回考湖廣還立學規培士習有蘇湖師範丁艱歸哀毀如禮不飲酒茹葷不入內者三年服闋補永城復入闈同校奉檄代縣捕蝗炎天烈日旬餘不少息別境受災禾禾卒無恙歿

之日囊無餘貲所著有學規八則日知錄慎思錄孝經序解行世

王者棟字觀光康熙甲午舉人丁未進士少孤事母至孝學有根柢數主邑書院多所成就當事以經學儀型旌其廬初任廣東東安縣知縣以養告歸後除補浙江慶元縣知縣所至多有賢聲卒於官著有文集行世

高以紹字子哲好讀書手不釋卷淹通經史年未冠補弟子員旋食餼尤重實行克敦孝友爲士林所矜式課子授徒唯以嚴肅門下多英俊士癸巳登賢書赴禮闈薦不售惜之卒

年七十有三

耿漢元恩貢生字傑三號鐵庵孝友出天性爲學先德行後  
文藝而湛深經術試輒爲諸生冠拔萃後友教四方門羅俊  
彥賦鹿鳴列鬻序者百餘人尤潛心理窟著有體認錄四書  
話要五經大旨藏於家

郭玉林字卓凡幼穎異隨父官署無貴介氣好讀書腹笥宏  
博孝弟克敦入國學多吟咏著有格致錄耕樂堂詩草夢藝  
軒詩草咏八景詩數章入舊志歷四十年族中稱公正者無  
間言平生好義有郭元連女五歲父母俱無本門無能養育  
者玉林自爲收養諭妻許氏教以內則其衣食訓誨皆如已  
女擇配邑庠生尙灼林子鶴年庠生鴻年舉人

郭廷和字夢圭性豪爽不願就制科援例入監惟賦詩飲酒  
自娛性耽古今書籍琅琅滿口日以課子弟爲事子雲鷺歲  
貢雲鵬庠生雲鴻副榜雲鶴拔貢姪九江庠生皆其所教育  
云

龍復字培元號蘭齋乾隆丁酉拔貢少孤事母至孝撫孤姪  
應乾成立制藝宏富屢列前茅拔萃後授生徒經多所成就  
教子嚴肅具有法度長子廷圭歲貢生次子廷霖嘉慶辛酉



大原縣志 卷之五  
援貢四子廷言嘉慶癸酉拔貢孫之黼庠生年七十三卒著  
有詩文集藏於家

耿奇英由副貢生選授葉縣教諭學優品端引掖士子唯以  
先正遺規一時感發奮興多所成就文風蒸蒸日上嘉慶元  
年楚匪入豫境中丞景檄委縣令廖守保安驛飭奇英代理  
縣事及匪臨城下率鄉勇防守越三晝夜弗懈城乃無恙上  
憲嘉之

郭鴻年字實恒少勤學弱冠中乾隆庚子科舉人康邑知名  
士多從游焉郭氏入黌序中鄉試者咸受啟迪後發廣東試  
用知縣告改鎮平縣儒學訓導到任卽舉修清陽書院文風  
大振六年卒於官

李朗字天章歲貢生少勤學蜚聲黌序孝友稱於鄉黨邑中  
俊秀多出其門年近七十未嘗干公事藩伯匾獎學優品端  
王維翰邑庠生博覽羣書潛心理窟啟迪生徒多成就焉仲  
弟宅三歲貢季弟俊三副貢子淑度邑庠孫鳳池食餼弟子  
成名者有拔貢李心丹等數十人家學相衍桃李滿門里黨  
欽之

劉士貴字榮三賦性穎異讀書過目成誦凡所涉覽歷久不

忠當時號爲書庫小試輒冠軍己酉選拔庚申登賢書事親備極色養母歿水漿不入口者數日居喪三年未嘗見齒課生徒受裁成者數十人四入禮闈屢薦不第士論惜之

郭來賓字客周乾隆丙子副榜甲寅舉人性端重嗜經史教授生徒多所成就登賢書列鬢序者百餘人嘉慶癸酉授鄧州學正引掖士子一遵先正遺規一時文風爲之丕振著有明經堂詩稿藏於家

張西嶺字鼎臣性孝友耽書史戊午登賢書年六十事八十老親朝夕問起居毫無倦容授生徒四十餘年理法爲宗鹿

淮太等邑賴以成就者百餘人嘉慶辛酉授永城訓導課士維嚴文風蒸蒸日上焉嗣老告歸猶手不釋卷咸稱耄而好學云歿年八十有三

施明遠字秉鑑歲貢生性恬靜好讀書室無斗儲布衣蔬食晏如也父患病腮漏湯藥必親嘗甘旨不缺乏鄉黨稱之與族人共建祠堂修譜牒以聯族誼同宗化之晚歲課諸生文藝竟日無惰容子雲漢姪省齋龍光策名學校出其門者成就不下百人生平不預外事隻字未入公門著有敦本稿藏於家壽七十三而卒

邑庠生朱奎光字健菴例封文林郎少失恃依父成人幼聰敏至孝父病每進湯藥必先親嘗親族奇之十二通五經工詩賦十七父卒成家產以行喪禮號仆於地絕而復蘇者數及長好善樂施文學著名教子課徒一時成名者頗多年四十八無疾而終著有梅郵詩集萬全醫書稿藏於家

許然字熙南號浩存賦性穎敏雅善詩文乾隆初年考試增律詩一首康邑人多未諳邑侯武公延入書院教詩一時韻學音律皆所傳授舊志載然詩甚夥子永堦歲貢生亦精詩賦兼工書法邑中知名士多出其門就教職未仕卒

### 孝友

晉袁質字道和自漁至質五世並以道素繼業惟其父耽以雄豪著及質又以孝行稱官歷琅邪內史東陽太守質子湛晉書

本傳

南宋謝述字景先小字道兒少有至行隨純在江陵純遇害述奉純喪還都至西塞遇暴風純喪舫流漂不知所在述乘小船尋求經純妻庾舫過庾遣人謂曰小郎去必無及寧可存亡俱盡邪述號泣答曰若安全至岸尚須管理如其已致意外述亦無心獨存因冒浪而進見純喪幾沒述號叫呼天幸而

獲免咸以爲精誠所致武帝聞而嘉之及臨豫州諷中正以爲主簿甚被器遇兄景仁愛魁而憎述嘗設饌請宋武帝希命魁豫坐而帝召述述知非景仁夙意又慮帝命之請急不從帝馳遣呼述須臾乃餐其見重如此及景仁疾述盡心視湯藥飲食必嘗而後進衣不解帶不鹽櫛者累旬景仁深感愧焉友愛遂篤及景仁卒哀號過禮爲太尉參軍從征司馬休之封吉陽縣五等侯元嘉二年拜中書侍郎後爲彭城王義康驃騎長史領南郡太守義康入相述又爲司徒左長史轉左衛將軍蒞官清約義康遇之甚厚雍州刺史張邵以贖

貨將至大辟述表陳邵先朝舊勳宜蒙優貸文帝手詔嘉納述語子綜曰主上矜邵夙誠自將曲恕吾所啟謬會故特見納若此跡宣布則爲侵奪主恩使綜對前焚之帝後謂邵曰卿之獲免謝述力焉卒於吳興太守及劉湛誅義康外鎮將行歎曰謝述唯勸吾退劉湛唯勸吾進述亡而湛存吾所以得罪也文帝亦曰謝述若存義康必不至此幼子緯尙宋文帝女長城公主方雅有父風位正員郎子朏

袁最字文高父粲謀攻齊高帝不克還戴僧靜挺身暗往奮刀直前欲斬之最大叫抱父乞先死兵士人人莫不隕涕粲

曰我不失忠臣汝不失孝子僧靜并斬之最時年十七見案傳

南齊袁象字緯才顓弟顓之子也顓好學美才早有清譽仕宋位

武陵內史象少有風氣善屬文及談元舉秀才歷諸王府參

軍不就觀臨終與兒顓書曰史公才識可喜足慰先基矣史

公象小字也及顓見誅宋明帝投屍江中不許斂葬象與舊

奴一人微服求屍四十餘日乃得密瘞石頭後岡身自負土

懷其文集未嘗離身明帝崩後乃改葬顓從叔司徒粲祖舅

征西將軍蔡興宗並器之仕宋為齊高帝主簿祕書丞仕齊

為中書郎兼太子中庶子又以中書郎兼御史中丞坐彈謝

超宗簡奏依違免官後拜廬陵王諮議時江陵人苟蔣之弟

胡之婦為沙門所淫夜入苟家蔣之殺沙門為官司所檢蔣

之列家門穢行欲告則恥欲忍則不可實已所殺胡之列又

如此兄弟爭死荊州刺史盧江王求博議象曰夫迅寒急節

乃見松筠之操危機迴構方識貞孤之風竊以蔣之胡之殺

人原心非暴辯讞之日友于讓生昔文舉引謗獲漏踈網蔣

之心迹同符古人若陷以深刑實傷為善由是蔣之兄弟免

死累遷太子中庶子出為冠軍將軍監吳興郡事象性剛固

以微言忤武帝又薄王晏為人晏讒之到郡坐過用錄錢免

官付東冶豕妹爲竟陵王子良妃子良世子昭胄時年八歲見武帝而形容憔悴帝問其故昭胄流涕曰臣舅負罪今在徇方臣母悲泣不食已積日臣所以不寧帝曰特爲兒赦之數日與朝臣幸冶履行庫藏因晏飲賜因徒酒肉赦見豕與語明日釋之後爲侍中豕幼而母卒養於伯母王氏事之如親閨門孝義隆昌元年卒諡靖子

南史本傳

袁廓之字思度宏之曾孫也父景雋宋世爲淮南太守以非罪見誅廓之終身不聽音樂布衣蔬食足不出門示不臣於秦時人以比晉之王袁顏延之見其幼時歎曰有子如袁廓足矣齊國建方出仕稍至殿中郎王儉柳世隆傾心待之爲太子洗馬于時何澗亦稱才子爲文惠太子作楊畔歌辭甚側麗太子甚悅廓之諫曰夫楊畔者旣非典雅而聲甚哀思殿下當降意簫韶奈何聽亡國之響太子改容謝之

謝幾卿超宗子超宗坐事徙越召家人不得隨幾卿年八歲別父於新亭不勝慟遂投於江救之良久涌出耳目口鼻出水數斗十餘日始能言居父憂哀毀幾滅年十一召補國子生及長好學博涉累遷爲晉安王府主簿

南袁昂字千里雍州刺史顓之子也顓敗時昂年五歲乳媪攜

抱匿於廬山州郡於野求之於乳媪匿所見一彪因去遂免  
會赦得出猶徙晉安在南唯勤學至元徽中聽還時年十五  
初顛敗傳首建鄴藏於武庫以漆題顛名至是始還之昂號  
慟嘔血絕而復蘇以淚洗所題漆字皆滅人以為孝感葬訖  
更制服廬於墓次從兄彖常撫視抑譬之昂容質修偉冠絕  
人倫以父亡不以理終身不聽音樂後與彖同見從叔司徒  
粲粲謂彖曰昂幼孤而能至此故知名器自有所在仕齊為  
王儉鎮軍府功曹史儉後為丹陽尹於後堂獨引見昂指北  
堂謂曰卿必居此累遷黃門郎昂本名千里齊永明中武帝

謂曰昂昂千里之駒在卿有之今改卿名為昂即字千里後  
為衛軍武陵王長史丁母憂哀毀過禮服未除而從兄彖卒  
昂幼孤為彖所養乃制期服後為御史中丞時尚書令王晏  
弟詡為廣州多納賕貨昂依事劾奏不憚權家當時號為正  
直出為豫章內史丁所生母憂去職以喪還江路風潮暴駭  
昂乃縛衣著柩誓同沈溺及風止餘船皆沒唯昂船獲全咸  
謂精誠所致葬訖起為吳興太守永元末梁武帝起兵州郡  
望風皆降昂獨拒境帝手書喻之昂答曰都史至尊誨承籍  
以眾論謂僕有勤王之舉兼蒙誚責獨無送款循復嚴旨若

大周縣志 卷之五  
臨萬仞三吳內地非用兵之所况以偏隅一郡何能為役近  
奉敕以此境多虞見使安慰自承靡飾屆止莫不膝祖軍門  
唯僕一人敢後至者正以自揆庸素文武無施直是陳國賤  
男子耳雖欲獻心不增大軍之勇置其愚默寧沮眾帥之威  
幸籍將軍含宏之大可得從容以禮竊以一餐微施尙復投  
殞况食人之祿而頓忘一旦非唯物議不可亦恐明公鄙之  
建康城平昂舉哀慟哭時帝使豫州刺史李元履巡撫東土  
敕元履曰袁昂道素之門世有忠節天下須共容之勿以兵  
威陵辱元履至宣旨昂亦不請降開門徹備而已及至帝亦

不問其過天監二年以為後軍臨川王叅軍事尋為侍中遷  
吏部尙書帝謂曰齊明帝用卿為黑頭尙書我用卿為白頭  
尙書良以多愧對曰臣生四十七年於茲矣四十以前臣之  
自有七年以後陛下所養七歲尙書未為晚達帝曰士固不  
妄有名十五年為尙書左僕射尋為尙書令時僕射徐勉勢  
傾天下在昂處宴賓主甚歡勉求昂出內人傳盃昂良久不  
出勉苦求之昂不獲已命出五六人始至齋閣昂謂勉曰我  
無少年老嫗並是兒母非王妃母便是主大家今令問訊卿  
勉聞大驚求止方知昂為貴昂在朝譽謗世號宗臣昭明太



子薨立晉安王綱為皇太子昂獨表言宜立昭明長息歡為皇太孫雖不見用擅聲朝野自是告老乞骸骨不干時務昂雅有人鑒遊處不雜入其門者號登龍門大通中位司空大同六年薨時年八十遺疏不受贈諡諸子累表陳奏詔不許諡曰穆正公有集二十卷南史

謝瞻字宣鏡年數歲所生母郭氏疾瞻晨昏溫清勤容戚顏未嘗暫改恐僕役營疾懈倦躬自執勞為母疾畏驚而微踐過甚一家尊卑感瞻至性咸納屢行屏氣語如此者十餘年

位黃門侍郎

以上俱南史本傳

謝蘭字希如安之八世孫也五歲時父未食不先食乳媪強之終不進舅阮孝緒嘆曰此兒在家則曾子之流事君則燕生之匹因名蘭父經北中郎諮議參軍卒晝夜號慟毀瘠骨立母阮氏常自守視譬抑之服闋吏部尚書蕭子顯嘉其至行擢為王府法曹行參軍後為兼散騎常侍會侯景入附境上交兵蘭母既慮不得還感氣而卒及蘭還入境感夢馳歸至則號慟嘔血而氣絕家人救甦水漿不入口每哭輒眼耳口鼻皆血流遂卒所製有甘露頌兖州刺史蕭楷德政碑及諸詩賦數十篇

謝貞字元正藺之子幼聰明有至性祖母阮先苦風眩每發便一二日不能飲食貞始七歲祖母不食貞亦不食丁父艱號頓於地絕而復蘇者數家人及從父洽族兄萬譬以母須侍養不宜毀滅乃少進饘粥及魏克江陵入長安母流離失依出家於宣明寺貞與母睽隔每獨處必晝夜啼泣周武帝愛弟趙王招貞舊為侍讀察知其情因出居藩奏請放還貞迎母歸養後為南平王友掌記室事府長史以母憂去職頃之敕啟還府累啟固辭不許貞哀毀羸瘠終不之官

以上南史本傳

明王杰字景用厚重博學篤於孝友兄庶乙卯舉人早卒杰撫

猶子盡慈愛知縉雲縣雲巖邑當孔道一以平易誠懇應之會病乞休士民追送數百里歸則課農耕教子弟有司舉鄉飲子堽貢士堽成進士至副都御史贈如官

王朝元字輔宸歲貢生性端嚴躬行孝友兄獻叅軍惠及齊魯弟賢方伯德被兩湖輔宸雖不在宗族仰為典型鄉里稱其長厚

江泰字景哲年十三而孤母王守節依舅氏洪武末母卒泰揭貲合葬廬墓側晝夜哀慕家失火鄰里奔告畧不答問鄉人難之有司狀聞旌表

陳智字孝禮年三歲而孤母孟氏守節及長母曰吾與汝無  
祖母何以有今日今祖母年九十餘當竭力奉養時疾作智  
進湯藥衣不解帶祖母終合葬先塋令妻侍母自廬於墓側  
寢苦枕塊不茹葷酒二年知縣劉濬請於朝旌表

徐舜耕字孝卿性豁達文學行誼有聲於時在宗族最長附  
循卑幼因才教育得敦睦之道任縣主簿勤懇周慎務盡  
其職歿繼室方自盡以殉詔旌其門

張文通字道亨性孝友弟雖異爨不分彼此爲代納其逋賦  
弟不知也數月不見有催賦者乃知之親黨貧乏傾囊用之

不恡嘗爲薄宦力所得爲無有弗竭素位而行人皆稱之

賈珥字同玉博學篤行孝友備至父早世無厚產母拮据諸  
弟俱幼苦身奉母久困諸生中讀書不怠以明經任鄒縣教  
諭身教率先士多譽髦

石守燧字巽齋以明經任滁縣訓導遷河間教諭端偉有度  
性簡澹恥爲世趨問道者屢滿姪可介幼失怙撫如已子長  
教誨成名家貲頗豐命四子與介均析無二視益亦人所難  
者

郭存智字勉之參政緒之季子父卒廬墓側三年朝夕哀奠

不茹葷酒建堂室刻碑覆亭母卒亦如之有司奏聞旌表  
魏珣號述野弟璠號仰野父年老珣璠俱在垂髫資產爲長  
兄所漁家道落絕不較也事父母孝養備至及歿哀毀骨立  
兄弟同爨七十年內外大小無間言珣子祚泰郡庠生博極  
羣書善草隸璠子祚永領庚午鄉薦兄弟閉戶讀書沉默自  
守輕財樂義賈有孫翁者寧家寄鏹鐵各半百十五年不至  
至則封識宛然貫索已朽邑令梁以樟表其閭曰孝友里

耿光字黎炤增廣生世業農多隱德至光兄弟始以文章著  
父應科好善樂施同居七世內外幾百口歿時子女尙幼光

身任之事繼母孝課諸弟嚴諸弟亦奉教惟謹通衢凡一可  
容十餘人外內各以次共食尺布以粟不入私室焉老年在  
堂十餘年坐臥一榻光晨昏扶侍如嬰兒赴試大梁旅店拾  
遺金數百俟其主歸之至今道其遺事不衰弟耀字太炤歲  
貢生炳字祿炤崇禎壬午舉人考授推官耿氏以孝友名世  
子孫守其家法中州稱禮讓者以耿氏爲最

耿耀字太炤歲貢生光異母弟少從兄學事之如父師凡出  
入食坐必諮命而後行光友愛彌至嘗與之財耀曰家有長  
兄我無用此爲也壬午逆闖陷太康耀率弟肩輿昇母避河

朔貿布供甘旨母歿哀毀力疾扶柩渡河時許定國襲高傑與平兵攻之道路梗塞耀挽車於燧燧戈鋌中晚述家訓置祭田修家譜著絃推草詩文數帙行世

耿炳字祿炤光異母季弟與仲兄耀同受學於長兄光事之如嚴師孝悌之行聞於里閭嘗因亂偕仲兄昇母河朔兵燹流離色養無間母卒喪葬弔者觀禮焉溫和接物一鄉稱長厚仲兄嘗謂之曰建祠垂訓諸事炳弟與余苦心訂確有心可嘔無方可措其自治精勤如此炳既登賢書望道心篤迺棄禮闈不試謁湯司空弑於睢陽印証心學且以不獲見蘇

門先生爲憾上以守兩兄之家法而下以詩書垂裕後昆者皆炳之力也晚歲安貧樂道教授子弟兄光嫡孫帝德膺鸚薦兄耀季子繡彝成進士以臨湘令陞禮部孫儉德昭德立德連舉孝廉鄉里榮之存年四十七歲

耿於彝字舜中庠生手姿倜儻能飲善書以學行舉鄉飲大賓父喪未葬值闖賊屠太康居民逃竄於彝獨抱父柩號泣不去賊大至迫之曰汝獨不畏死耶推墮城下傷腰脊不死越三日賊退踉蹌歸家以土掩柩而後去時歲大祲人相食邑令贈穀四十斛悉解其餘以賑貧人督家人廣種菜子明

春菜發任人刈取全活無數年八十二卒飄然若仙云

國朝

張鉉邑庠生性至孝城破父病不能行生負走賊逼欲殺之鉉至誠哀告數四賊曰孝子也釋之臨終窮迫多方措置其物必備母病百日鉉晝夜不離二妹皆分貲產曲遂母心有司以孝行奏聞

劉杓邑庠生湛子數歲時村居突聞寇驚舉家奔竄杓急扶母行去家見羣賊入室痛父未出叫號回而不知其已脫也發憤大罵被賊慘殺

邵詵邑廩生性孝友父病侍藥終年不解衣及喪不飲酒茹葷三年不寓內時節哀痛如孺子泣與兄共居五十年恪遵其教兄無子養葬皆如禮孝子悌弟竊不愧焉

魏衷字丹宸庠生父觀駟爲諸生遊學滇南陷吳逆中十年音書阻隔舉家憂悞衷伴嬉笑慰母背輒飲泣迨父歸家母歿哀毀骨立日中服勞奉養晝夜悲痛父患痰鬱臥床兩月丹宸衣不解帶夜靜籲天願以身代父患初平而衷因勞瘁委頓將死握其次兄手曰弟不孝不能終事親今死矣願爾兄善侍老父言罷大慟而卒衷素性醇謹尤精舉子業既歿

邑人哀之以上俱舊志

孟化梁

張士賢

葛松

劉桂

劉一魁

五人廬墓旌表

王贊年十六時父染病朝夕侍湯藥不倦久之父病益篤贊默禱神割股肉煎湯和藥以進父病旋愈

軒茂良父邁疾日夜祝天求以身代數年弗替父卒水漿不入口廬墓側堆土成邱植松柏雉兔馴於內經年不去正統中旌表

單溥邑庠生天性孝友母患痰症臥不起湯藥飲食必躬親不離左右者凡七年有兄不治生分產蕩盡溥以已田給之復蕩盡死遺幼娃撫若已子嘗饑出粟百餘石分濟鄰族賴以全活者甚眾

萬烜十歲喪母哀毀如成人事繼母劉克盡孝道劉卒有所生遺腹子方幼烜夫婦保護成人深相友愛著式好集劉父鍾奇老無子羈京師烜迎歸為納妾舉一子復延師教之成立

蔣桂昌者義民也桂昌未育時父先有養子曰蘭昌桂昌長待之如親兄其庶母弟克昌實嫉之桂昌察其情分地三十

畝令自爲爨又念地少不足以贍俾勿蓄牛驢值耕獲皆代爲力歲以爲常蘭昌有女將嫁粧奩悉爲置辨蘭昌卒復備棺殮葬

陳亮友母病急割股和藥以進母病立瘥

季文明性純孝母早卒事父及繼母徐盡色養徐卒爲廬墓者三年邑令馮廉其實旌之曰行姪閔賢

劉廣生邑庠生好善樂施見推鄉黨少失母依祖母成立事繼母高不啻所生撫弟洪烈友愛備至祖母老病廣生奉養惟謹湯藥必躬親不嘗假手僕婢人稱其孝友無虧科舉蔡

公旌其祖母曰閩門儀型

柳毓芳字德滋狼山總戎同春長子性沉毅遇大事聲色不動居家以孝友著事父母每先意承志與弟景芳正芳相友愛常如童子時少多疾不任家事會

朝議世廕總戎固屬意仲子而公居長公微窺父志卽稱疾讓同鄉有急難多爲排解年六十九卒

鄭履謙字六吉協次子早列邑庠康熙癸卯膺選拔性穎敏經書寓目輒成誦著述甚夥以家貧不能付梓多致散失事親色養得父母心居母憂三年無笑容事繼母不啻所生父



病侍湯藥五旬衣不解帶以勞成疾處兄弟推讓分產族黨有緩急必悉力助之不少吝慷慨尚義有父風

朱景嵩與弟景華郡增生性孝友父母亡時兄弟俱幼依祖母成人家無口糧祖母年老不能具食兄弟忍飢往郊外採薪為生每日赴市賣薪畢即先買饌肉奉養祖母兄十五聘葉氏賢祖母病臥床三年衣不解帶每進湯藥必先親嘗祖母不食景嵩兄弟亦不食祖母卒嵩兄弟不飲酒茹葷者三年逢時節哀痛如孺子泣其弟漸長聘何氏亦盡婦道四方莫不稱奇迄今兄弟同居共爨八十餘年

武生王棟彩性至孝母早逝哀毀悲思每元旦朔望忌辰具祭饗必泣涕數年不懈父疾身親湯藥衣不解帶數十日不離臥側病小愈棄秋闈不試邑侯陶匾獎行美白華高麟趾性醇謹竭力奉父母歿廬墓百日性好施予屢敦任郵邑人稱之邑令武以一鄉善士旌其門

董廷桂性至孝塋親後廬墓三年堆土成邱邑侯馮旌以匾吳應嵩字中山恩貢生天性友愛篤於倫誼幼失怙事繼母尤謹兄弟析烟後念弟食指多將已田三頃宅一區與之後因長姪家口眾又與地一頃里黨稱盛德焉遷桐柏教諭以

年老辭不就職壽八十六歲

李以建庠生幼失怙其母以節孝著建朝夕奉養盡孝盡禮喪葬後廬墓三年康熙辛丑年邑侯馮以孺慕性生旌之劉思麟性至孝父病日夜憂痛焚香籲天願以身代及病愈茹素三年

李文紀字謹度庠生性孝友克敦實行足跡不履城市家貧古耕以奉甘旨得父母歡心友于一堂怡怡如也士林稱之道光八年邑侯戴以動遵古訓旌其廬

耆壽

張珣字遜公孝友性成樂施好善壽八十有六

欽賜八品冠帶配宋氏賢明助夫教子家法肅然五代一堂身所親見者七代最諸孫與曾元有和尢助苦之風壽八十有四嘉慶二十四年

欽賜緞疋及七葉衍祥字樣表其門閭子永祿太學生慷慨好施守家法孫念祖庠生欽祖署任直隸靜海縣知縣繩祖福建桃源店巡檢曾孫鴻逵候補未入鴻賓候補從九夫福由德致壽爲仁徵張氏世德邑里重之

姜文舉年九十歲五代同堂撫部院畢匾獎康年襲慶

朱秀世業農無奇行亦無惡德年百一十三歲三受 恩獎

劉臻字見光生於雍正四年至道光五年年已百歲 恩獎

德壽三次男五人孫六人曾孫七人元孫二人五世同居和

睦隣里終身無訟鄉黨艷稱之

張樸兄弟五人和睦無間長朴年八十九次齊年八十六三

生員崑年八十三四泰年七十九五儼年七十六學憲張匾

獎德星聚會

李亭電字雲蒼醇謹方正教子弟以耕讀睦宗族息爭訟壽

九十一歲受三次

恩賞準給八品衣頂子培玠壽八十二歲培璠壽八十歲皆受二

次

恩賞齒高德劭里黨欽之

李念舜現年八十四歲公平正直有長者風屢蒙

恩賜米肉絹帛准給衣頂邑侯戴匾獎曰

聖朝人瑞

彭青松年九十七歲髮耆好學品行端方里黨稱之受兩次

恩賞

王天成年九十三歲蒙兩次

恩賞

王氏一門五老邑北瑯琊岡庠生王謙之孫與其曾孫也嘉慶初年皆八九十餘鬚眉皓白雍睦一堂一時稱五老焉一  
九法字冠周醇謹慈惠事母至孝壽八十九一九鵬字搏萬  
監生性情剛直行事慷慨壽九十一一劭字象州庠生性恬  
淡不慕榮利居家孝友備至遇親疎老幼接以字信而禮法  
秩然爲里黨所矜式年八十餘猶好學不倦端坐一室終日  
無情容壽九十一一步餘字留園光明俊偉倣儻有國士風

乾隆四十一年授鄭州司訓繼遷睢州學正

同宗聖壽八旬得與千叟宴蒙 聖貺詔宴寧壽宮賜之衣杖壽八

十七一猶龍字紹聘生平與人無爭好讀書至忘寢食教訓  
生徒多所成就壽九十三一堂五老世所罕見固積善之慶  
也洵 聖世之瑞乎

孔毓琦黃巢岡人壽八十歲子四長傳堯七十六次傳敬九  
十二受 皇恩三次三傳儉八十六四傳學八十二孫五長  
繼先七十六次繼志九十二受

皇恩二次三繼韶年已七十九四繼沐入邑庠年已七十六五

繼祝年已七十三一堂三世十老皆忠誠質實樂善好施與人無競終身不入公庭一方之人咸仰重焉

張文宗住四村地方樂善好施耕讀傳家壽至百歲卒

張頓選兄弟六人五世同居

許文光年八十八歲素敦孝友稼穡克勤子孫蕃衍五世同

居嘉慶二十三年巡撫陳匾給熙朝人瑞

牛玉重年九十一歲善良承家耕耘樂業五世同居道光元年邑侯詳請題旌

軒轅軍例貢生負性醇良年九十二歲猶精神矍鑠親見七

代五世同堂道光二年邑侯載詳請題旌

張憲國學生年八十七歲德壽可嘉乾隆三十二年學憲匾

獎梓里儀型子錫齡貢生邑侯趙匾給敦崇古處

周天行賦性慷慨好義率弟躬耕冬施衣粥夏施茶水與人  
不較屈直立祠堂置祭田族人周漢蘇家貧撫養讀書成名  
里人稱之年九十二歲而卒

程紹先乾隆乙酉科

恩賜舉人庚辰

欽賜翰林院檢討壽九十五成就生徒甚眾子孫列膠庠者甚繁

鮑朋受五次恩貢衣頂榮身壽至二百零四歲

李學思無奇行亦無惡德壽百有五歲邑侯孫旌之

義行

明

王元佐字彥才由徵辟任河南裕州判陞濠州定遠縣尹以  
事調山東鹽運司官臺場令尋陞通州同知終奉訓大夫彰  
德路判所至皆有惠政以孫淪貴贈通議大夫戶部右侍郎  
元至正間太康大饑令家人自淮西運米千餘石賑濟鄉人  
全活者甚眾子孫繁衍簪纓接武人以爲積善所致後成化  
戊子河南歲饑開封府金守檄西華知縣陳嘉謨並饒州富  
民段二十八閉糶有火災刊爲善惡圖以喻部民至今猶存  
王相明嘉靖年間邊警內帑乏輸銀五百兩詔授五品散官

立坊

李紇捐地三百三十畝爲學田師尙詔反輸粟一千五百石  
草二萬束詔旌立坊

張四維萬歷二十一年大饑輸粟五百石先陳州饑輸雜糧  
一千石詔旌立坊候選通判

楊體文國子生天啟二年歲歉助賑巡撫都察院馮匾獎尙  
義崇禎六年邑侯張四獎清時髦俊年八十有二

劉心乾崇禎十一年凶荒瘟疫流行饑民相聚爲盜乾輸粟  
五百石銀一千兩呈請築堡自守兩院上聞奉敕修建明

亂獨此堡全活最多

郭進儀邑庠生輸粟二百石銀五百兩呈請築堡自守兩臺  
嘉之往如所請

張淑周太康人住朱華村事父母盡孝無兄弟篤於族誼世  
以施藥放生爲事至淑周周貧濟困如恐不及叔父銘閣歿  
遺孤貧困淑周供以菽水不使乏從兄淑郭警淑周周之終  
其身從姪克敬死家貧孤子無依淑周給貲使謀生佃戶之  
無力娶妻者助之族人葬喪不能舉者賙之逼歲除大雪中  
絕糧賴以存活者衆西安客馬輝卿覆舟江中淑周爲具衣

服被褥留四十餘日給貲送之海門人姜晏河被海災挈家二十八口投親於洛過門求濟淑周留之十日助之貲而西新野人孫姓携男女十口風雨中至淑周門孫有兒方出痘淑周留養二十日痘者愈始資而遣之與睢州王文斗友善文斗貧乏不能自存淑周迎養于家十餘年沒而塋之五世以來不識賭具有賭博者望見淑周輒匿里中言不善事不可令張淡溪知淡溪者淑周字也時人比之王彥方云張士賢隣人谷某赴糴於市道亡其金歸而一家嗷嗷無以哺欲自經家人號泣士賢聞往慰之贈以白金舉家感德

郭文登歲飢捐賑修城捐資邑侯沈以事聞欽賜義官

尙孟仕居縣東北高朗集歲值大稔輸粟脩賑全活者以萬計城池頽壞捐貲補修助費三千餘金邑侯沈以事聞欽賜匾額獎以冠帶署縣事長孫卽孚辰也次孫瞻辰由選舉授寧國府同知有惠政儒學吳撰文以表其墓

補遺

國朝王諤字塞臣性孝友慷慨好義值歲饑流離載道諤捐穀

石助賑賴以全活者甚衆事聞巡撫以惠周梓里旌其廬生員王謙捐錢二十萬助國餉太守遂以慕義維勤旌之

監生郭宗哲慷慨尙義雍正十三年歲饑捐穀三百石助賑



督撫王給匾獎之曰廣施仁粟

生員陳進德雍正十二年修文廟輸銀七十兩修二賢祠輸銀五十兩十三年建普濟堂輸穀八十石邑令吳以募義急公詳請太守安獎以義敦任卹匾額

貢生郭書雍正十三年輸賑穀一百石乾隆八年輸賑穀一百石十二年輸書院銀五十兩十四年輸普濟院銀五十兩太守邑令屢給匾示獎

鄭協字寅恭沉靜寡言讀書雖隆冬盛暑不少輟弱冠補博士弟子員文名益著後學師事多所成就存心平恕而好義遇人有忿爭卽曲爲勸諭有危難輒傾囊賙之忠厚之稱雖童穉莫不知之年八十餘以壽終前邑侯吳以匡城人瑞表其廬

監生牛域雍正十一年輸修學宮銀五十兩邑令吳給匾旌獎十二年輸社倉穀五十石乾隆元年歲饑散穀六百餘石不收其值每歲冬遇無衣者爲製衣死無棺者買以殮之撫諸孤姪一如已出子貢生學孔遵遺命焚券計捐粟五百餘金曾孫錫麟嘉慶二十年捐義倉谷三百石邑候孫旌之

貢生王講值歲飢捐銀百兩救貧人邑令吳旌之曰瑞映三

槐

丁金字予斯太學生性至孝少失怙恃叔母節婦魏孺人撫養之比長爲孺人請旌建坊孺人終喪塋盡禮視若已母邑侯吳以猶子楷模獎之金尤慷慨好義族黨有急輒周濟之普濟堂屢年捐粟米疲瘵殘疾俱蒙實惠太守安旌其門曰仁風可尙巡撫王表其廬曰樂善尤殷

楊木鐸字聖宣器識明敏博覽經史以府試第一補弟子員壬子秋闈已經中式卒以數違式抑之主司惜焉性至孝事父母得其歡心親歿廬墓數月爲人謙和不以卑賤而生慢

易尤重然諾好施與見婚塋不能舉者助以財一切義舉輒自爲倡無吝色亦無德色里黨推爲長者乙巳大禮道殣相望出粟濟貧全活無算晚年受癱患臥床褥間猶以州急扶困囑其子歷年稱貸未償者悉焚其券壽七十一子紹先侯選衛千總次繼先侯選布政司經歷俱克承父志嘉慶丙子樂捐義倉穀石邑侯孫匾獎誼敦梓里道光七年捐義學志局經費二百金

楊玉鐸貢生性孝友親病晨昏侍湯藥弗懈歿盡喪禮塋廬墓側生平好施見婚喪不能舉者助以財有素好鄰人家中

落欠金兩千餘兩未償輒焚其券嘉慶癸酉歲饑周急鄰里不可枚舉并助賑輸粟三百石邑侯高匾獎積厚流光已卯捐絃歌書院膏火銀二千兩太守李匾獎以穀我士庚辰歲試八學生貢陳民徐梁裕等呈請督學部院盧匾給義澤延禧道光丙戌年邑侯戴以洛社耆英額其廬壽七十九子持衡生員克繼父志輸義學志局經費五百金

楊秉衡字鑑昭世有隱德祖宏菴樂善好施族里稱長者父肅公雅有父風早逝母賈氏矢志松筠舅姑稱孝內外無間言鑑昭捐衛千總事寡母朝夕承歡尤慷慨以濟人急婚葬

力不及者捐橐金以助之稱貸弗克償者其多言以次之歲饑散穀四百石修河橋捐貲累千金施義漿以給行旅延名師以成一方子弟里黨嘖嘖稱道子五人武魁清魁舉於鄉聚魁占魁廷魁列成均俱克承先志子修邑乘建義學武魁捐錢三百千

毛士緒崔橋人樂善好施出於天性里閭稱長者子伯龍雲龍武舉仲龍監生士緒卒兄弟克承先志修學宮捐金倡首嘉慶十八年奇荒崔橋放賑伯龍佐邑侯高辦賑經理安詳不辭勞勩且傾已倉廩不恤也高給額獎之傳家以禮讓爲

本孫曾鵠起游庠序者十餘人

監生程效先恩貢生圖南之父也生平寡言語重然諾從不  
道人之短遭親喪盡哀盡志三年無笑容家頗豐歲饑糶谷  
價由人定不償亦不討鄰里賴以全活者最多有鄰人李喬  
赤貧無依收養在家併出資爲娶妻以延後嗣蓄僕女數人  
歲豐遣歸不索值樂施好善周飢濟貧里黨重之壽八十三  
卒時如仙去

劉永成性好義乾隆二十二年歲飢族親周元奇來依成衣  
食之爲之授室鄰有家貧鬻妻以養母者詢得其情出資以  
贖俾得仰事俯畜無患焉歷久未償約二百餘金悉取其券  
焚之子文光歲貢生孫及元曾十餘人人以爲義行之報云  
王亮采千總嘉慶十八年歲歉助賑捐穀一百石二十四年  
黃水漂沒民居助賑放餼捐穀一百石道光元年瘟疫流行  
施藥濟人費錢百餘千里黨咸稱德焉

王國範從九捐輸義倉穀三百石太守李匾獎好義可風邑  
侯孫亦以匾旌之

李明遠五十無子乾隆三十六年捐錢三百千修灣子橋越  
二年遂生子人以爲義德所感云

監生劉警菴嘉慶十八年荒歉助賑施飯輸錢壹伯千

劉應萬千總扶邑東北二十里姜家村三聖廟施地九十餘畝廟南有毛家橋修崎嶇路一條捐錢四百餘千

監生姜榮閣雍正十三年捐賑穀三百石邑侯馮以仁風可尙獎之

劉天佑拾銀三百不昧心給還原主鄉黨義之

朱起翔庠生村東南隅置義地十畝施棺木以瘞尸骸隣吳學詩文大秋婚姻不遂助吳銀六十五兩文銀十三兩里黨咸推重之

王隨棟性好善住鐵佛寺集門臨大道每歲交夏施茶三十餘年郡伯錢嘉之免其雜派邑侯陶匾獎曰慕義知勉壽八十而卒

張德基監生樸實好義有古人風嘉慶二十四年黃水漂沒民居德基助官拯濟施饘萬餘親自乘桴送之以救困民水退又施米麵以濟逃水之民且精岐黃術有請卽往不索謝貧者助以藥資恤困憐貧解難排紛鄉黨義之邑侯戴旌其

門閭

李昌齡字夢九增貢生天性和平持躬孝友裕於財積而能

散兄弟二人析烟後置祭田三十餘畝凡婚葬不能成禮者悉力助之設家塾戚族子弟咸來學焉淮邑陳秉乾等荷其成就入邑庠至今猶嘖嘖弗衰負其債者積至數千金囑子焚其券卒年五十一子益之太學生克承父志有宗人廣寒者家貧爲衣食之且助以膏火俾得盡心舉業尋入庠更爲成室捐五里口市房十三間入義學永爲肄業之所輸義學志局三百金父子濟美鄉評重之

魏天一歲貢生孝友廉潔父患沉疾侍榻前三年不懈作保時不受賄有托以干進者正色以拒之值歲饑嘗施粟濟貧

又以棺斂死無歸者鄉里咸義之

韓從龍字霞光由武庠捐衛千總歷年投生徒貧富俱不受修脯且給以弓馬出其門下多所成就乾隆五十一年施穀濟貧數月嘉慶十八年歲饑助賑捐穀五十石道光元年歲大疫施藥餌貧不能斂葬者給棺木見義必行饒有古風以長子允升仕

單恩誥封徵仕卽允升初署泰安通判嘉慶十八年咨授濮州州判時教匪滋事率鄉勇守城歷署定陶城武荷澤等縣有惠政次子俊升捐義學修志經費錢二百千

苑如淳字存樸衛守備通經書誦韜畧品正行端慷慨好義鄰有負債三千餘金悉焚券不問好成人美設武學三十載給弓馬資膏火贍費無算如武舉劉魁龍武生孔傳洛等皆所成就壽六十子瀛洲生員守家訓有父風

王崇和字叔介性慷慨好施予祖遺丹藥方能瘳久年痾疾每歲施藥不惜重金行之八十餘年至今弗倦乾隆五十一年麥後閭邑患時疫求藥者門前若市全活甚衆厥後悉心岐黃請卽赴自携藥囊蠶劑以救人不索價值里民感之送其額曰惠及珠圓子本諱孫崧品監生

劉國字宏倉太學生賦性剛方言動不苟見者輒爲斂容平日孝於親友於兄弟分爨後弟家中落國有園地數十畝悉讓與之延師課子督責雜嚴其仲子由選拔舉於鄉族中有不能舉火者停柩未葬者婚嫁乏具者咸仰給焉自處節儉而救荒輒傾囷倉以哺隣里不少吝惜凡橋路修築率捐貲爲衆人倡閭里以爲有長者風郡伯昌額其門曰碩德耆英壽八十五而卒

宋榕性端方少失怙恃事諸兄甚恪性好施予族有名杓者幼習技藝爲之教養且成室焉後舉於鄉任太康把總同宗

育萬成進士物故家貧甚出貲斂葬凡閭里之艱於婚嫁及老幼無依者多出裕之俟助乾隆五十一年歲饑待以舉火者甚夥其間居厭塵囂名花怪石布置滿庭院恬如也

張克展字子布監生樂善好施親族貧困無依者收養之隣有貧不能婚者出資以成之凡單寒讀書代出束金助以薪米多所成就村臨大道祖父施茶五十年克展繼之施茶三十餘年里黨義之

監生苑模雍正十三年捐義穀百石陳州府太守安匾其門曰義敦任郵

千總苑如泗設立武義學四十餘年成就數十人嘉慶十八年捐穀百石助賑邑侯高匾獎曰俊傑凌雲

曹瓚字子玳好善樂施族人允禮家貧爲之娶妻隣有萬姓宅隘甚分地予之不取值無德色孀婦徐氏死買棺以葬之又施義地四畝以葬四方之窮氓且犯而不校民多感德里黨義之邑侯馮表其門曰德壽堪型

李克齊性朴誠好善精於女科施丸散每歲約費數十金有求卽與絕無德色凡服其藥者病立愈輒得子嗣克齊施藥五十餘年子繼祖紹其事又已二十餘年不倦遠邇咸德里



黨義之

姜維馨傳

已卯舉人 龐建本 邑教諭

姜五德字維馨邑增生讀書明大義尤慷慨敢任咸豐四年  
粵西逆匪擾河南所在奸民乘勢蠢起有

旨命各郡縣練鄉兵以資捍禦時邑侯祝爽亭下令籍里丁製  
器械籌備甚周而鄉愚未盡喻相率譁然五德獨奮曰彼第  
五倫余飛何人哉士民沐膏澤二百餘年一旦有事顧齷齪  
偃蹇何負

聖恩及侯意乃爾乎且吾屬獨無室家性命耶遂日走窮鄉僻巷

家為論之屬天炎暑汗灑灑喘不休而英勃之氣不可遏雖  
謗譁沸騰匿帖揭於門弗動也故五德處邑西鄙與扶壤接  
民素狡悍多盜賊竟賴以靖謐六月二十二日以震於礮卒  
邑侯深悼之贈額曰矢公盡瘁嗚乎太邑得五德者數十輩  
真干城哉

隱逸

魏袁徽渙從弟以儒素稱遭天下亂避難交州司徒辟不至徽弟敏有武藝而好水功官至河隄謁者初天下將亂渙慨然歎曰漢室陵遲亂無日矣苟天下擾攘逃將安之若天未喪道民以義存唯彊而有禮可以庇身乎徽曰古人有言知幾其神乎見幾而作君子所以元吉也天理盛衰漢其亡矣夫有大功必有大事此又君子之所深識退藏於密者也且兵革旣興外患必衆徽將遠迹山海以求免身及亂作各行其

志

魏志及袁宏漢紀

明王銓字士衡太康人經明行修不求聞達淡泊明志怡然  
自樂

王瀛字子登博通經史不干仕進陋巷蓬戶自適也

王濡字子賁好學通達長於詩文方伯禮聘修通志奏聞擢  
用力辭不就養母終身不屈其志

顧璵字廷璠佐之子也淹洽經傳能詩作梅花百咏絕意仕  
進自號梅花道人

徐貢羽字宸旌少負時名精尚書博極羣籍為鄉祭酒不求  
聞達士論高之

石可建字瑾山家習素封厭薄聲華讀書一室進退古今不  
屑屑為雕虫技隴頭陌上野叟黃童相對與語意泊如也其  
澹適如此

國朝

段啟祥字瑞符進士舒之子志高潔隨父任無公子氣腹笥  
宏博不干仕進河南學使張為舒門生勸應試堅不往復饋  
百金論納監入闈固不受曰士各有志勿相強也隱居城南  
耕讀自適百歲而終

李向周字秋汀少穎異不事帖括遊學嵩洛間道藝克成歸  
里會大中丞馬征湖北聘教各弁奇之間咨軍機時老河口

太平店雲陽府次第報捷中丞益知周拔擢有成議矣固辭  
道憲林以德優型足旌其間同時官弁過陽夏者必謁焉卒  
年七十二

宦寓

郭祐之開封府通判元末家太康傳御史治書曾苑馬監正  
在豐鎮江府知府濟四川叅政緒南太僕寺正顯忠

劉亨山東費縣人永樂間任儒學教諭遂家於邑

馬俊浙江山陰人永樂間任縣丞後家於邑

雜傳

吳廣陽夏人二世發間左戊漁陽席與陳勝皆爲屯長會天  
大雨道不通度已失期當斬乃與勝共舉事勝自立爲將軍  
廣爲都尉入據陳豪傑響應卒以平秦

袁悅之字元禮陳郡陽夏人也父明給事中悅之能長短說  
甚有精理始爲謝元叅軍爲元所遇丁憂去職服闋還都上

一作齊戰國策言天下要唯此書後甚爲會稽王道子所親  
止愛每勸道子專覽朝權道子頗納其說俄而見誅

謝萬字萬石才器雋秀雖器量不及兄安而善自衒曜故早  
有時譽簡文帝作相召爲撫軍從事中郎爲揚州刺史再遷

豫州刺史領淮南太守監司豫冀并四州軍事假節萬既受任北征矜豪傲物以嘯詠自高未嘗撫眾召集諸將都無所說直以如意指四坐云諸將皆勁卒諸將益恨之既而先遣征虜將軍劉建修治馬頭城池白率眾入渦潁以援洛陽北中郎將邳曇以疾病退還彭城萬以爲賊盛致退便引軍還眾遂潰散狼狽單歸廢爲庶人

謝石字石奴萬之弟淮肥之役詔以將軍假節征討大都督與兄子元琰破符堅遷中將軍尙書令封南康郡公疾篤進位開封儀同三司加鼓吹未拜卒石少患面瘡療之莫愈乃

白晝夜有物來舐其瘡隨舐隨差舐處甚白故世呼爲謝白面石在職務存文刻既無他才望直以宰相弟兼有大勳遂居清顯而聚斂無饜取譏當世

袁顥字景章陽夏人太尉淑兄子景和元年以顥爲使持節都督雍梁等州軍事雍州刺史顥詐被太皇太后令使起兵勸晉安王子勛卽大位子勛徵顥下尋陽顥不能撫接諸將劉劼叛走顥夜遁至鵠頭爲戍主薛伯珍所殺

袁充字德符陽夏人其後寓居丹陽祖昂父君正俱爲梁侍中仕陳爲散騎常侍陳滅歸國歷樂郟二州司馬充好道術

顏解占侯煬帝即位超拜祕書郎帝每征討充預之假託星象獎成帝意在位者皆切患之宇文化及弑逆之際並誅充隨書

李可灼授鴻臚寺寺丞明光宗病進紅丸

上體 賜金幣 見明史



